

四庫全書

子部

欽定四庫全書

子部

日知錄卷二十二

詳校官中書臣賈鏌

員外郎臣牛稔文覆勘

覆校官中書臣田尹衡

校對官中書臣袁文邵

謄錄監生臣席大賓

欽定四庫全書

月知錄卷三十二

崑山 顧炎武 撰

四海

書正義言天地之勢四邊有水鄒衍書言九州之外有

大瀛海環之是九州居水內故以州爲名

州古洲字

然五經

無西海北海之文而所謂四海者亦槩萬國而言之爾

禮記祭義推而放諸西海而準推而放諸北海而準亦是槩言之海至左傳齊桓公言寡人處北海則直指齊地而孟子言伯夷辟居北海之濱唐時爾雅九夷八以濰州爲北海郡而樂昌縣遂有伯夷廟

蠻六戎五狄謂之四海周禮校人凡將有事於四海山川註四海猶四方也則海非真水之名易卦兌爲澤而不言海禮記鄉飲酒義曰祖天地之左海也則又以見右之無海矣

史記曰者傳地不滿東南以海爲池

虞書禹言予決九川距

四海據禹貢但有一海而南海之名猶之西河即此河爾

禹貢之言海有二東漸于海實言之海也聲教訖于四海槩言之海也

宋洪邁謂海一而已地勢西北高東南下所謂東北南
三海其實一也北至於青滄則曰北海南至於交廣則
曰南海東漸吳越則曰東海無繇有所謂西海者詩書
禮經之稱四海蓋引類而言之至如莊子所謂窮髮之
北有冥海及屈原所謂指西海以爲期皆寓言爾程大
昌謂條支之西有海先漢使固嘗見之而載諸史史記大宛
傳于寘之西則水皆西流注西海又曰奄蔡在康居西
北可二千里臨大澤無崖蓋乃北海云漢書西域傳條
支國臨
西海

後漢班超又遣甘英輩親至其地而西海之西又有大秦夷人與海商皆常往來霍去病封狼居胥山其山實臨瀚海蘓武郭吉皆爲匈奴所幽寘諸北海之上而唐史又言突厥部北海之北有骨利幹國在海北岸然則詩書所稱四海實環華裔而四之非寓言也然今甘州有居延海西寧有青海雲南有滇海安知漢唐人所見之海非此類邪

九州

九州之名始見於禹貢

祭法共工氏之霸九有也其子曰后土能平九州此前乎禹而

有九州之名

周禮職方氏疏曰自神農以上有大九州柱州

迎州神州之等至黃帝以來德不及遠惟於神州之內

分爲九州

史記孟子荀卿傳騶衍言中國名曰赤縣神州赤縣神州內自有九州禹之序九州是也

不得爲州數中國外如赤縣神州者九乃所謂九州也

蓋天下有九州古之帝者

皆治之後世德薄止治神州神州者東南一州也

河圖括地

象東南神州正南卬州西南戎州正西兗州正中冀州西北柱州北方玄州東北咸州正東陽州淮南子地形訓同而以西北爲台州正北爲濟州東北爲薄州正東爲陽州隋書北郊之制有神州迎州冀州戎州拾州柱

州營州咸州陽州唐初房玄齡與禮官議以爲神州者國之所託餘八州則義不相及遂除迎州等八座惟祭皇地祇及神州此荒誕之說固無足采然中國之大亦未有窮

其涯域者尹耕兩鎮志引漢書地理志言黃帝方制萬

里畫埜分州得百里之國萬區而疑不盡於禹九州之

內且曰以今觀之涿鹿

今保安州

東北之極陬也而黃帝以

之建都金山

在懷來城北

塞上之小山也而黃帝以之合符

則當時藩國之在其西北者可知也

晉載記慕容廆以大棘城即帝額頊

之墟也乃移居之通輿棘城在營州柳城東南一百七十里

秦漢以來匈奴他部如

爾朱宇文之類往往祖黃帝稱昌意後亦一證也

按魏周諸

書惟云魏之先出自黃帝軒轅氏黃帝子曰昌意昌意之少子受封北國而爾朱氏無聞宇文氏則云其先出自炎帝神農氏今舍拓跋而言爾朱宇文

誤也

遼史言耶律嚴稱遼為軒轅後

厥後昌意降

居帝摯遜位至於洪水之災天下分絕而諸侯之不朝

者有矣以書考之禹別九州而舜又肇十二州其分爲

幽并營者皆在冀之東北

書肇十有二州傳云肇始也禹治水之後舜分冀州爲幽

州并州分青州爲營州始置十二州

高

必其前閉而

誘註淮南子云古之幽都在鴈門以北

後通前距而後服者也而此三州以外則舜不得而有

之矣此後世幅員所以止於禹迹九州之內而天地之

氣亦自西北而趨於東南日荒日闕而今猶未已也

蔡仲

默書傳亦謂當舜之時冀北之地未必荒落如後世

騶子之言雖不盡然亦豈可

謂其無所自哉

幽并營三州在禹貢九州之外先儒謂以冀青二州地

廣而分之殆非也

孔安國馬融並云青州當越海而有遼東並無據

幽則

幽則

今涿易以北至塞外之地

書流共工于幽洲孟子作州括地志云在檀州燕樂縣界

今順天有密雲縣

并則今忻代以北至塞外之地營則今遼東

大寧之地其山川皆不載之禹貢故靡得而詳

凡漢之上谷漁

陽右北平遼西遼東山川皆不載之禹貢惟碣石為右北平驪城縣山然此但為夷之貢道爾然而益

稷之書謂弼成五服至于五千則冀方之北不應僅數

百里而止遼東地理志言幽州在渤海之間并州北有

代朔營州東暨遼海營衛志言冀州以南歷洪水之變

夏后始制城郭其人土著而居并營以北勁風多寒隨

陽遷徙歲無寧居曠土萬里或其說之有所本也劉三

吾書傳謂孔氏以遼東屬青州隔越巨海道里殊遠非

所謂因高山大川以爲限之意蓋幽并營三州皆分冀

州之地

又引歐陽志與地廣記以遼東營州屬冀州

今亦未有所攷

禹畫九州在前舜肇十二州在後肇始也昔但有九州

今有十二州自舜始也

漢書地理志堯遭洪水天下分絕爲十二州使禹治之更制九

州與書肇十有二州之文不同蓋漢人之說如此故王莽據之爲秦陳氏經曰禹貢之作乃在堯時至舜時乃

分九州爲十二州至夏之世又并爲九州故傳言貢金九牧竹書紀年帝舜三十三年夏后受命于神宗遂

復九州亦未可信

然則謂禹貢九州爲盡虞夏之疆域者疏矣

夏商以後沿上世九州之名各就其疆里所及而分之

故每代小有不同

周書爾雅各與禹貢不同

周禮量人掌建國之法

以分國爲九州曰分則不循於其舊可知矣

周禮職方東北曰幽

州其山曰醫無閭藪曰獫狁山川曰河汭浸曰菑時醫無閭在今遼東廣寧衛獫狁澤註云在長廣今山陽萊陽縣已無迹可考而青之菑時究之河汭襟出於一條之中殆不可據

州有二名舜典肇十有二州禹貢九州大名也周禮大

司徒五黨爲州州長註二千五百家爲州左傳僖十五

年晉作州兵宣十一年楚子入陳鄉取一人焉以歸謂

之夏州昭二十二年晉籍談荀躒帥九州之戎

註州鄉屬也五

州爲鄉

哀四年士茂乃致九州之戎十七年衛侯登城以

望見戎州國語謝西之九州何如

如註謝西有九州二千五百家爲州竝

小名也陳祥道禮書二百一十國謂之州五黨亦謂之

州萬二千五百家謂之遂一夫之間亦謂之遂王畿謂

之縣五鄙亦謂之縣

江淮河濟謂之四瀆而易坎爲水爲溝瀆大小之極不嫌同名

六國獨燕無後

春秋之時楚最彊楚之官令尹最貴而其爲令尹者皆
同姓之親至於六國已滅之後而卒能自立以亡秦者

楚也嘗考夫七國之時人主多任其貴戚如孟嘗平原
信陵三公子毋論楚之昭陽昭奚恤昭睢韓之公仲公
叔趙之公子成趙豹趙奢齊之田嬰田忌田單單之功
至於復齊國至秦則不用矣而涇陽高陵之輩猶以擅
國聞獨燕茂有子之之於王噲未知其親疎自昭王以
降無一同姓之見於史者及陳項兵起立六國後而孫
心王楚僭王齊咎王魏已而歇王趙成王韓惟燕人乃
立韓廣豈王喜之後無一人與不然燕人之哀太子丹

豈下於懷王而忍亡之也蓋燕宗之不振久矣嗚呼楚
用其宗而立懷王者楚也燕用非其宗而立韓廣者燕
也然則晉無公族而六卿分秦無子弟而閹樂弑魏削
藩王而陳留篡于司馬宋昝宗子而二帝没于金人皆
是道矣詩曰宗子維城無俾城壞無獨斯畏其斯之謂
與

郡縣

漢書地理志言秦并兼四海以爲周制微弱終爲諸侯

所喪故不立尺土之封分天下爲郡縣盪滅前聖之苗裔靡有子遺後之文人祖述其說以爲廢封建立郡縣皆始皇之所爲也以余觀之殆不然左傳僖公三十三年晉襄公以再命命先茅之縣賞胥臣宣公十一年楚子縣陳十二年鄭伯逆楚子之辭曰使改事君夷于九

縣

註楚滅諸小國爲九縣

十五年晉侯賞士伯以瓜衍之縣成公

六年韓獻子曰成師以出而敗楚之二縣襄公二十六年蔡聲子曰晉人將與之縣以比叔向三十年絳縣人

或年長矣昭公三年二宣子曰晉之別縣不惟州五年

蓬啟疆曰韓賦七邑皆成縣也

註成縣賦百乘也

又曰因其十

家九縣其餘四十縣十年叔向曰陳人聽命而遂縣之

二十八年晉分祁氏之田以爲七縣分羊舌氏之田以

爲三縣哀公十七年子穀曰彭仲爽申俘也文王以爲

令尹實縣申息晏子春秋昔我先君桓公子管仲狐與

穀其縣十七說苑景公令吏致千家之縣一於晏子戰

國策智過言於智伯曰破趙則封二子者各萬家之縣

一史記秦本紀武公十年伐邽冀戎初縣之十一年初

縣杜鄭吳世家王餘祭三年予慶封朱方之縣則當春

秋之世滅人之國者固已爲縣矣

按昭二十九年傳蔡墨言劉累遷于魯縣

則夏后氏已有縣之名周禮小司徒四甸爲縣遂人五
鄙爲縣縣士註距王城二百里以外至四百里曰縣亦
作寰國語管子制齊三鄉爲寰寰有寰帥十寰爲屬屬
有大夫 顏師古曰古書縣邑字皆作寰以縣爲縣掛
字後人轉用爲州縣字其縣
掛之縣又加心以別之也史記吳王發九郡兵伐齊

范蠡對楚王曰楚南塞厲門而郡江東甘茂謂秦王曰
宜陽大縣名曰縣其實郡也春申君言於楚王曰淮北

地邊齊其事急請以爲郡便匈奴傳言趙武靈王置雲

中鴈門代郡燕置上谷漁陽右北平遼西遼東郡以屯

守又言魏有河西上郡以與戎界邊則當七國之世而

固已有郡矣

袁公二年傳趙簡子誓曰克敵者上大夫受縣下大夫受郡杜氏註引周書作雒篇

千里百縣縣有四郡古時縣大而郡小說文周制天子地方千里分爲百縣縣有四郡至秦初置三十六郡

以監其縣今按史記吳王及春申君之事則郡之統縣罔不始於秦也

吳起爲西河守馮

亭爲上黨守李伯爲代郡守西門豹爲鄴令荀況爲蘭

陵令城渾說楚新城令衛有蒲守韓有南陽假守魏有

安邑令蘓代曰請以三萬戶之都封太守千戶封縣令

趙封馮亭亦云

而齊威王朝諸縣令長七十二人則六國之未

入於秦而固已先爲守令長矣故史言樂毅下齊七十餘城皆爲郡縣而齊湣王遺楚懷王書曰四國爭事秦則楚爲郡縣矣張儀說燕昭王曰今時趙之於秦猶郡縣也安得謂至始皇而始罷戾置守邪傳稱禹會諸侯執玉帛者萬國至周武王僅千八百國春秋時見於經傳者百四十餘國又并而爲十二諸侯又并而爲七國

此固其勢之所必至秦雖欲復古之制一一而封之亦有所不能而謂罷侯置守之始於秦則儒生不通古今之見也

秦分天下爲三十六郡其中西河上郡則因魏之故雲中鴈門代郡則趙武靈王所置上谷漁陽右北平遼西遼東郡則燕所置史記不志地理而見之於匈奴之傳孟堅志皆謂之秦置者以漢之所承者秦不言魏趙燕爾

秦始皇議封建實無其本假使用淳于越之言而行封建其所封者不過如穰侯涇陽華陽高陵君之屬而已豈有建國長世之理

秦始皇未滅二國

古封建之國其未盡滅於秦始皇者衛世家言二世元年廢衛君角爲庶人是始皇時衛未嘗亡也

漢書地理志始皇既

并天下猶獨置衛君二世時乃廢爲庶人凡四十世九百年最後絕越世家言越以此散

諸族子爭立或爲王或爲君濱于江南海上服朝于楚

秦始皇本紀言二十五年王翦遂定荆江南地降越君

漢興有東海王搖閩越王無諸之屬

如今世之土司

是越未嘗

亡也西南夷傳又言秦滅諸侯惟楚苗裔尚有滇王然則謂秦滅五等而立郡縣亦舉其大勢然耳

漢王子侯

漢王子侯之盛無過哀平之間王莽傳五威將帥七十

二人還奏事漢諸侯王爲公者悉上璽綬爲民

後漢書城陽恭

王祉傳莽篡立劉氏爲侯者皆降稱子食孤卿祿後皆奪爵

後漢光武紀建武二年

十二月戊午詔曰惟宗室列侯爲王莽所廢先靈無所
依歸朕甚愍之其竝復故國若侯身已沒屬所上其子
孫見名尚書封拜是皆絕於莽而復封於光武之時然
漢書表傳中往往言王莽篡位絕而表言安衆侯崇居
攝元年舉兵爲王莽所滅侯寵建武二年以崇從父弟
紹封十三年侯松嗣今見師古曰作表時見爲侯也表
言今見者止此一人是光武之時侯身已沒者其子孫
亦但隨宜封拜而已

光武紀十三年下云其宗室及
絕國封侯者凡一百三十七人惟

安衆之以故國紹封者褒崇之忠非通例也又莽傳云
嘉新公國師以符命爲予四輔明德侯劉龔率禮侯劉
嘉等凡三十二人皆知天命或獻天符或貢昌言或捕
告反寇諸劉與三十二人同宗共祖者勿罷賜姓曰王
唯國師公以女配莽子故不賜姓武五子傳廣陽王嘉
以獻符命封扶美侯賜姓王氏諸侯王表魯王閔獻神
書言莽德封列侯賜姓王中山王成都獻書言莽德封
列侯賜姓王王子侯表新鄉侯佟

莽傳作
信鄉侯

元始五年上

書言莽宜居攝莽篡位賜姓王若此之類光武豈得而復封之乎又王子侯表序曰元始之際王莽攝朝僞褒宗室侯及王之孫焉居攝而愈多非其正故弗錄旋踵亦絕又可見莽攝位之所封者光武皆不紹封也夫惟於親親之中而寓褒忠之意則於安衆之封見之

後漢書卓

茂傳云劉宣字子高安衆侯崇之從弟知王莽當篡乃變名姓抱經書隱避林藪建武初乃出光武以宣襲封安衆侯宣或即罷之誤又李通傳云永平中顯宗幸宛詔諸李隨安衆宗室會見註引謝承書曰安衆侯崇長沙定王五代孫與宗人討莽有功隨光武河北破王郎朝廷高其忠壯策文嗟歎以厲宗室以表計之雖正是

五代孫而以紹封者爲名崇孫爲外錯當以前漢表爲正又劉隆傳曰隆字元伯南陽安衆侯宗室也王莽居攝中隆父禮與安衆侯崇起兵誅莽事泄隆以年未七歲故得免史文雖畧千載之下可以情測也此一代之大典不可不論

武五子傳昌邑王賀廢封爲海昏侯薨元帝復封賀子代宗爲海昏侯傳子至孫今見爲侯表云賀以神爵三年薨坐故行淫辟不得置後初元三年釐侯代宗以賀子紹封傳至孫原侯保世嗣傳至曾孫侯會邑嗣免建武復封是光武之復封有此二人安衆以褒忠海昏以

嘗居尊位故與

功臣表蕭何九世孫禹王莽始建國元年更爲蕭鄉侯

莽敗絕曹參十世孫宏舉兵佐軍

本傳云先降河北

詔封平陽

侯十一世侯曠嗣今見非光武之薄於鄼侯而厚於平陽也非有功不侯高帝法也

紅陽侯王泓以與諸劉結息父丹降爲將軍戰死

見元后傳

富平侯張純以先來詣闕

見后漢書本傳

皆得紹封

按功臣侯復封者三

人恩澤侯復封者四人高昌侯董永歸德侯襄平昌侯王獲三人功狀無考而周承休侯常自以周後

而

杜憲趙牧竝以先降梁王不得嗣光武命功之典如此

漢侯國

漢書地理志京兆尹左馮翊右扶風竝無侯國以在畿
內故也然功臣侯表有陽陵侯傅寬高陵侯王虞人恩
澤侯表有高陵侯翟方進竝左馮翊縣名功臣侯表平
陵侯蘓建平陵侯范明友右扶風縣名而高陵下曰琅
邪二平陵下曰武當則知此鄉名之同於縣者而非三
輔也若後漢則新豐侯單超新豐侯段熲京兆縣夏陽

侯馮異櫟陽侯景丹臨晉侯楊賜竝左馮翊縣好時侯
耿弇槐里侯萬修槐里侯竇武槐里侯皇甫嵩柁邑侯
宋弘鄱侯董卓竝右扶風縣而嵩傳云食槐里美陽兩
縣八千戶蓋東都之後三輔同於郡國矣

地理志侯國有注有不注殆不可曉意者班史亦仍前
人之文止據其時之見在者而書之乎

都

詩毛氏傳下邑曰都後人以爲人君所居非也

帝王世紀天子

所宮曰都釋名
都者國君所居

考之經則書之云大都小伯詩之云在

浚之都作都于向者皆下邑也左傳曰先王之制大都

不過參國之一中五之一小九之一

隱公元年

又曰邑有宗

廟先君之主曰都無曰邑

莊公二十八年

故晉二五言于獻公

曰狄之廣莫於晉爲都謂蒲也屈也士伯謂叔孫昭子

曰將館子於都謂箕也公孫朝謂季平子曰有都以衛

國也謂成也仲由爲季氏宰將墮三都謂郕也費也成

也萊章曰往歲克敵今又勝都謂廩丘也孟子王之爲

都者臣知五人焉謂平陸也韓子衛嗣君以一都買一

胥靡謂左氏也史記趙良勸商君歸十五都灌園於鄙

秦封鞅商十五邑

秦王請蘭相如名有司案圖指從此以往十

五都予趙齊王令章子將五都之兵因北地之衆以伐

燕張儀說楚王請效萬家之都以爲湯沐之邑而陳恢

見沛公亦曰宛大郡之都也其名始於周禮小司徒九

夫爲井四井爲邑四邑爲丘四丘爲甸四甸爲縣四縣

爲都

註四縣爲都方四十里

而王之子弟所封及公卿之采邑在

焉於是乎有都宗人都司馬其後乃爲大邑之稱耳

縣士

註距王城四百里以外至五百里曰都

故詩云彼都人士禮記月令命農

勉作毋休于都而宰夫掌郡都縣鄙之治

註羣都諸采邑也

商

子言百都之尊爵厚祿史記信陵君之諫魏王謂所亡

於秦者大縣數十名都數百則皆小邑之稱也三代以

上若湯居亳太王居邠竝言居不言都至秦始皇始言

吾聞周文王都豐武王都鎬豐鎬之間帝王之都也而

項羽分立諸侯王遂各以其所居之地爲都王莽下書

言周有東都西都之居而以雒陽爲新室東都常安爲

新室西都

莽改長安曰常安

後世因之遂以古者下邑之名爲

帝王京師之號蓋習而不察矣

史記商君傳築冀闕宮庭於咸陽秦自雍徙都之而集
小都鄉邑聚爲縣置令丞凡三十一縣上都國都之都
下都都鄙之都史文兼古今語

漢書晁錯傳言憂勞百姓列侯就都是以所封國邑爲
都後漢書安帝紀徙金城郡都襄武龐參傳燒當羌種

號多等皆降始復得還都令居是以郡治爲都而食貨
志言長安及五都以雒陽邯鄲臨畱宛成都爲五都而
長安不與焉此又所謂通邑大都居一方之會者也

如張

衡南都賦徐幹齊都賦劉
邵趙都賦庾闡揚都賦

若後世國都之名專於天子

而諸侯王不敢稱矣

史記孝景中三年軍東都門外此時未有東都其曰東

都門猶言東郭門也

程大昌以爲自此
出雒陽東都者非

三輔黃圖長安

城東出北頭第一門曰宣平門民間所謂東都門

鄉里

以縣統鄉以鄉統里備書之者史記老子楚苦縣厲鄉
曲仁里人樗里子室在昭王廟西渭南陰鄉樗里是也
書縣里而不言鄉史記高祖沛豐邑中陽里人

應劭曰沛縣也

豐其鄉也

聶政軹深井里人淳于意師臨菑元里公乘陽慶

漢書衛太子亡至湖泉鳩里是也亦有書鄉而不言里
史記陳丞相平陽武戶牖鄉人王翦頻陽東鄉人是也
古時鄉亦有城漢書朱邑傳其子葬之桐鄉西郭外

都鄉

集古錄宋宗慤母夫人墓誌涅陽縣都鄉安衆里人又云寔于秣陵縣都鄉石泉里都鄉之制前史不載按都鄉蓋即今之坊廂也漢濟陰太守孟郁堯廟碑成陽仲氏居都鄉高相里

都鄉侯

後漢封國之制有鄉侯有都鄉侯傳中言都鄉侯者甚多皇甫嵩封槐里侯忤中常侍趙忠張讓削戶六千更

封都鄉侯具瑗有罪詣獄謝上還東武侯印綬

上文作東武陽

侯

詔貶爲都鄉侯是都鄉侯在列侯之下也趙忠以與

誅梁冀功封都鄉侯

單超傳但言鄉侯今從本傳

延熹八年貶爲關

內侯

本傳作關中侯今從單超傳

是都鄉侯在關內侯之上也

關內侯無

食邑如淳以爲但爵其身見史記高后紀註

吳志孫

賁封都亭侯子鄰嗣進封都鄉侯是都鄉侯在都亭侯

之上良賀卒帝封其養子爲都鄉侯三百戶是都鄉侯所

食之戶數也梁冀得罪徙封比景都鄉侯是都鄉侯亦

必有所封之地而不言者史畧之也鄉侯都亭侯亭侯

或言地或不言地亦同此

皇后紀都亭侯註

凡言都亭

志縣侯第三品鄉侯第四品亭侯第五品關內侯第六品而無都鄉侯都亭侯

封君

七國雖稱王而其臣不過稱君孟嘗君平原君信陵君

春申君是也秦則有稱侯者如穰侯應侯文信侯而蔡

澤但爲剛成君漢興列侯曰侯關內侯曰君孔霸以師

賜爵關內侯號褒成君其薨也謚曰烈君

孔光傳

圖

宋時登科錄必書某縣某鄉某里人蕭山縣志曰改鄉
爲都改里爲圖自元始嘉定縣志曰圖即里也不曰里
而曰圖者以每里冊籍首列一圖故名曰圖是矣今俗
省作畱謝少連作歛志乃曰畱音鄙左傳都鄙有章即
其立名之始

趙宦光亦曰都鄙
本作畱俗誤讀圖

其說鑿矣

亭

秦制十里一亭十亭一鄉

風俗通曰漢家因秦大率十
里一亭亭留也蓋行旅宿會

之所以今度之蓋必有居舍如今之公署鄭康成周禮遺

人註曰若今亭有室矣故霸陵尉止李廣宿亭下張禹

奏請平陵肥牛亭部處上以賜禹徙亭它所而漢書註

云亭有兩卒一爲亭父掌開閉掃除一爲求盜掌逐捕

盜賊

任安先爲求盜亭父後爲亭長

是也

晉時有亭子劉卞爲縣小吏功曹銜之以他事補亭子

又必有城池如今之村堡

今福建廣東凡巡司皆有城

韓非子吳起

爲魏西河守秦有小亭臨境起攻亭一朝而拔之漢書

息夫躬歸國未有第宅寄居邱亭姦人以爲侯家富常

夜守之匈奴傳見畜布野而無人牧者怪之乃攻亭後

漢書公孫瓚傳卒逢鮮卑數百騎乃退入空亭是也

減宣

怒其更成信信亡藏上林中宣使郡令將吏卒闌入上林中蠶室門攻亭格殺信是上林中亦有亭也又

必有人民如今之鎮集漢封功臣有亭侯是也亦謂之

下亭風俗通鮑宣州牧行部多宿下亭是也其都亭則

如今之關廂司馬相如往臨邛舍都亭

史記索隱曰郭下之亭也漢書

註師古曰臨邛所治都之亭後漢陳實嘗爲都亭刺佐嚴延年毋止都亭不肯入

府何竝斬王林卿奴頭并所剝建鼓置都亭下後漢書

陳王寵有彊弩數千張出軍都亭會稽太守尹興使陸

續於都亭賦民饘粥酒泉龐娥刺殺讐人於都亭吳志
魏使邢貞拜權爲吳王權出都亭候貞是也京師亦有
都亭後漢書張綱埋其車輪於雒陽都亭竇武召會北
軍五校士屯都亭何進率左右羽林五營士屯都亭王
喬爲葉令帝迎取其鼓置都亭下是也蔡質漢儀雒陽
二十四街街一亭十二城門門一亭人謂之旗亭史記
三代世表褚先生言與方士考功會旗亭下是也

西京賦曰

旗亭五重薛綜註旗亭市門樓也立旗於其上故取名焉

後代則但有郵亭驛亭之

名而失古者居民之義矣

晉書載記慕容垂請入鄴城拜廟符玉不許乃潛服而入

亭吏禁之垂怒斬吏燒亭而去是晉時尚有亭名

亭侯

通典獻帝建安初封曹操爲費亭侯亭侯之制自此始也恐不然靈帝以解瀆亭侯入繼桓帝紀封單超等五人爲縣侯尹勲等七人爲亭侯列傳中爲亭侯者甚多大抵皆在章和以後丁綝言能薄功微得鄉亭厚矣樊宏願還壽張食小鄉亭則建武中似已有亭侯矣

楚漢春秋

高祖封許負爲鳴雌亭侯裴松之曰高祖時封皆列侯未有鄉亭之爵疑爲不然蜀志中山靖王子貞元狩六年封涿縣陸城亭侯按漢書作陸城侯志文衍一亭字

漢書王莽傳改大郡至分爲五郡縣以亭爲名者三百六十以應符命文

社

社之名起於古之國社里社故古人以鄉爲社大戴禮千乘之國受命於天子通其四疆教其書社管子方六里名之曰社是也左傳昭公二十五年齊侯唁公曰自

莒疆以西請致千社註二十五家爲社千社二萬五千

家

史記孔子世家冉有曰雖累千社夫子不利也索隱曰二十五家爲社

哀公十五年齊

與衛地自濟以西襍媚杏以南書社五百晏子景公予

魯君地山陰數百社又曰景公祿晏子以平陰與橐邑

反市者十一社又曰昔吾先君桓公以書社五百封管

仲不辭而受荀子與之書社三百而富人莫之敢距戰

國策秦王使公子他謂趙王曰大國不義以告敝邑而

賜之二社之地商子湯武之戰士卒坐陳者里有書社

呂氏春秋武王勝殷諸大夫賞以書社又曰衛公子啟方以書社四十下衛又曰越王請以故吳之地陰江之浦書社三百以封墨子今河南太原青州鄉鎮猶以社爲稱古者春秋祭社一鄉之人無不會集三國志注蔣濟爲太尉嘗與桓範會社下是也漢書五行志兗州刺史浩賞禁民私所自立社臣瓚曰舊制二十五家爲一社而民或十家五家共爲田社是私社隋書禮儀志百姓二十五家爲一社其舊社及人稀者不限後人聚徒

結會亦謂之社萬厯末士人相會課文各立名號亦曰某社某社崇禎中有陸文升奏訐張溥等復社一事至奉旨察勘在事之官多被降罰宋史薛顏傳耀州豪姓李甲結客數十人號沒命社會鞏傳章丘民聚黨村落間號霸王社石公弼傳揚州羣不逞爲俠於閭里號亡命社而隋末譙郡賊有黑社白社之名元史泰定帝紀禁饑民結扁擔社傷人者杖一百不知後之士人何取而名此也天啟以後士子書刺往來社字猶以爲汎而

曰盟曰社盟此遼史之所謂刺血友也

今日人情相與惟年社鄉宗四者而已除却四者便同秦越

歷代帝王陵寢

宋太祖乾德四年十月癸亥詔歷代帝王陵寢太昊以下十六帝各給守陵五戶蠲其他役長吏春秋奉祀尚中宗以下十帝各給三戶歲一享秦始皇以下十五帝各給二戶三歲一祭周桓王以下三十八帝州縣常禁

樵采仍詔吳越國王錢俶修奉禹墓其時天下未一而
首發此詔可謂盛德之事惜當日儒臣考之不審以致
傳訛後世如云周文王武王成王康王竝葬京兆咸陽
縣者按劉向曰文武周公葬于畢史記周本紀太史公
曰畢在鎬東南杜中皇覽曰文王武王周公冢皆在京
兆長安鎬聚東杜中
後漢志鎬在上林苑東孟
康曰長安西南有鎬池郭璞山
海經註同書序周公薨成王葬于畢傳曰不敢臣周公
故使近文武之墓正義曰案帝王世紀曰文武葬于畢

畢在杜南晉書地道記亦云畢在杜南與畢陌別史記

周本紀正義引括地志曰文王武王墓在雍州萬年縣

西南二十八里畢原上此其在渭水之南杜縣之中甚

明雜錄曰文都豐武都鎬豐鎬與杜相屬則皇覽謂文王葬于渭南者其理順也文王既葬渭南則周公葬

畢必附文墓矣而今乃祭於渭北咸陽縣之北十五里蓋據顏

師古劉向傳註畢陌在長安西北四十里之誤地道記已明言

與畢陌別矣按史記秦本紀集解引皇覽曰秦武王冢在扶

風安陵縣西北畢陌中冢是也人以爲周文王冢非

也周文王冢在杜中又秦始皇本紀末正義曰括地志云秦惠文王陵在雍州咸陽縣西北一十四里又云秦悼武王陵在雍州咸陽縣西十里俗名周武王陵非也是昔人已辯之甚明今祭周之文王武王而于秦惠文王悼武王之墓不亦誣乎

雍錄言元和一志皆李吉甫為之而周公之墓亦遂兩出

一云在萬年縣西南二十八里一云在咸陽縣北十三里則是白相殊異原其誤皆起於單名之有兩也至

云後魏孝文帝長陵在耀州富平縣東南尤謬魏書言帝孝於文明太后乃於永固陵東北里餘營壽宮遂有

終焉之志及遷雒陽乃自表瀍西以為山陵之所而方山虛宮號曰萬年堂云其曰方山者代都也瀍西者雒陽也孝文自代遷雒安得葬富平哉葬富平者西魏之文帝乃孝文之孫名寶炬以南陽王為宇文泰所立即位十七年葬永陵魏書出於東朝不載其事而北史為立本紀且曰嘗登逍遙觀望嵯峨山謂左右曰望此令人有脫屣之意然則今富平縣東南三十里之陵即永陵也

后妃傳文帝悼皇后郁久間氏大統六年崩葬于少陵原十七年合葬永陵當會橫橋北后梓宮先

至鹿苑帝輟輅後來將就次所軌折不進

上有宋碑乃謬指爲孝文之葬而

歷代因之豈非五代喪亂之餘在朝罕淹通之士而率

爾頒行不遑尋究以至於今日乎

宋游師雄紹聖元年普寧寺題名亦指此

爲西魏文帝陵

嗟乎近事之著在史書灼然如此而世之儒生

且不能知乃欲與之考橋山訂蒼梧其茫然而失據也

宜矣

又考冊府元龜唐高宗顯慶二年二月帝在雒陽宮遣使以少牢祭漢光武後魏孝文帝陵則孝文之祭在雒

陽於唐時未誤又曰憲宗元和十四年正月詔以周文
王武王祠在咸陽縣俾有司修飾則似已在渭北矣魏
書孝文太和二十一年五月遣使者以太牢祭周文王
于鄴武王于鎬隋書祀周文王武王于澧渭之郊舊唐
書周文王太公配祭于鄴周武王周公召公配祭于鎬
竝與皇覽之言合自古所傳當在渭南又韓文公南山
詩前尋徑杜墅空蔽畢原陋亦謂其在杜中韓即元和
間人或其遺跡未泯憲宗之詔言祠不言墓非一地也

乾德四年詔誤以魏孝文文帝爲一人淳化閣帖誤以

梁高祖武帝爲二人

宋史黃伯思病淳化閣帖乖謬龐祿作刊誤二卷

堯冢靈臺

漢書地理志濟陰成陽有堯冢靈臺後漢書章帝紀元和二年二月東巡狩使使者祠唐堯于成陽靈臺安帝紀延光三年二月庚寅使使者祠唐堯于成陽皇覽云堯冢在濟陰成陽皇甫謐帝王世紀云堯葬濟陰成陽西北四十里是爲穀林水經注城陽西二里有堯陵陵

南一里有堯母慶都陵於城爲西南稱曰靈臺

後漢堯母碑曰

慶都僂歿蓋葬于此
欲人莫知名曰靈臺

鄉曰崇仁邑號修義皆立廟四周

列水潭而不流水澤通泉泉不耗竭至豐魚筍不敢採
捕廟前竝列數碑枯柏成林二陵南北列馳道逕通皆
以磚砌之尚修整堯陵東城西五十餘步中山夫人祠
堯妃也石壁階墀仍舊南西北三面長櫟聯蔭扶疏里
餘中山夫人祠南有仲山甫冢冢西有石廟羊虎破碎
畧盡於城爲西南在靈臺之東北宋史神宗熙寧元年

七月己卯知濮州韓鐸言堯陵在雷澤縣東穀林山陵

南有堯母慶都靈臺廟請敕本州春秋致祭置守陵五

戶免其租奉洒埽從之

成陽在漢為濟陰屬縣北齊廢
隋復置為雷澤縣唐宋因之金

復廢今曹州東北六十里故雷澤城是也

而集古錄有漢堯祠及堯母祠碑

是廟與碑宋時猶在也然開寶之詔帝堯之祠乃在鄆

州

今在東平州東北三十里蓋泉山之陽

意者自石晉開運之初黃河決

于曹濮堯陵為水所浸乃移之高地乎而後代因之不

復考正矣

元史泰定帝紀泰定二年四月丁酉濮州鄆城縣言城西堯冢上有佛寺請徙之不報

舜陟方乃死見於書禹會諸侯於塗山見於傳惟堯不聞有巡狩之事墨子曰堯北教乎八狄道死葬蛭山之陰舜西教乎七戎道死葬南己之市禹東教乎九夷道死葬會稽之山此戰國時人之說也自此以後呂氏春秋則曰堯葬于穀林太史公則曰堯作游成陽劉向則曰堯葬濟陰竹書紀年則曰帝堯八十九年作游宮于陶九十年帝游居于陶一百年帝陟于陶說文陶再成邱也在濟陰有堯城堯嘗所居故堯號陶唐氏而堯之

冢始定于成陽矣但堯都平陽相去甚遠耄期之年禪

位之後豈復有巡遊之事哉因堯偃朱之說竝出於竹

書而鄆城之跡亦復相近

括地志曰故堯城在濮州鄆城縣東北十五里竹書云昔

堯德衰為舜所囚也又有偃朱故城在縣西北十五里竹書云舜囚堯復偃塞丹朱使不與父相見也按此皆戰國人所造之說或人告燕王謂啟攻益而奪之天下辯非子言湯使人說務光自投于河大抵類此詩

書所不載千世之遠其安能信之山海經海外南經狄

山帝堯葬于陽註呂氏春秋曰堯葬穀林今成陽縣西

東阿縣城次鄉中赭陽縣湘亭南皆有堯冢

臨汾縣志曰堯陵在城東七十里俗謂之神林高一百五十尺廣二百餘步旁皆山石惟此地爲平土深丈餘其廟正殿三間廡十間山後有河一道有金泰和二年碑記竊考舜陟方乃死其陵在九疑禹會諸侯於江南計功而崩其陵在會稽惟堯之巡狩不見經傳而此其國都之地則此陵爲堯陵無疑也按志所論似爲近理但自漢以來皆云堯葬濟陰成陽未敢以後人之言爲信

生祠

漢書萬石君傳石慶爲齊相齊人爲立石相祠于定國
傳父于公爲縣獄吏郡中爲之立生祠號曰于公祠漢
紀欒布爲燕相有治迹民爲之立生祠此後世生祠之
始

後世無官不建生祠然有去任未幾而毀其像易其主
者舊唐書狄仁傑爲魏州刺史人吏爲立生祠及去職
其子暉爲魏州司功參軍貪暴爲人所惡乃毀仁傑之

祠則唐時已有之矣後漢書張翕爲越雋太守有遺愛其子湍復爲太守蠻人懽喜奉迎道路曰卽君儀貌類我府君後湍頗失其心有欲叛者諸蠻耆老相曉語曰當爲先府君故遂以得安然則魏人之因子而毀其父祠曾越雋蠻人之不若邪

生碑

西京雜記平陵曹敞其師吳章爲王莽所殺人無敢收葬者弟子皆更名他師敞時爲司徒掾獨稱吳章弟子

叔葬其屍平陵人生爲立碑於吳章墓側此生立碑之始

晉書南陽王模爲公師藩等所攻廣平太守丁邵率衆救模模感邵德勅國人爲邵生立碑唐彬爲使持節監幽州諸軍事百姓追慕彬功德生爲立碑作頌史之所書居官而生立碑者有此二事

唐武后聖歷二年制州縣長吏非奉有勅旨毋得擅立碑劉禹錫高陵令劉君遺愛碑序曰太和四年高陵人

李仕清等六十三人具前令劉君之德詣縣請以金石刻縣令以狀申于府府以狀考于明法吏吏上言謹按寶應詔書凡以政績將立碑者具所紀之文上尚書考功有司考其詞宜有紀者乃奏明年八月庚午詔曰可舊唐書鄭瀚傳改考功員外郎刺史有驅迫人吏上言政績請刊石紀德者瀚探得其情條責廉使巧跡遂露人服其敏識是唐時頌官長德政之碑必上考功奉旨乃得立宋史言太祖建隆元年十月戊子詔諸道長貳

有異政請立碑者委參軍驗實以聞今世立碑不必請
旨而華衮之權操之自下不但溢美之文無以風勸而
植於道旁亦無過而視之者不旋踵而與他人作鎮石
矣

冊府元龜宋璟爲相奏言臣伏見韶州奏事云廣州與

臣立遺愛頌

璟嘗爲廣州都督

夫碑所以頌德紀功臣在郡日

課無所稱幸免罪戾一介俗吏何足書能濫承恩施見
在樞密以臣光寵成彼諂諛欲革此風望自臣始請勅

廣府即停從之時鄭州百姓亦爲前刺史孟溫禮樹碑
因是亦命罷之

張籍送裴相公赴鎮太原詩明年塞北平蕃落應建生
祠請立碑以晉公之勲名而頌祝之辭止此當日碑祠
之難得可知矣

張公素

前明一統志永平府名宦有唐張仲素德宗時以列將
事盧龍軍節度使張允伸擢平州刺史允伸卒詔仲素

代為節度使同平章事考之新舊唐書列傳則云張仲武為盧龍節度使破降回鶻又破奚北部及山奚威加北翟擢累檢校司徒同中書門下平章事卒

一統志亦有張仲武

列於仲素之後

子直方多不法畏下變起奔京師軍中以張允

仲總後務詔賜旌節在鎮二十三年比歲豐登邊鄙無虞張公素以軍校事允仲擢平州刺史允仲卒子簡會為副大使公素以兵來會喪簡會出奔詔以公素為節度使性暴厲眸子多白燕人號白眼相公為李茂勲所

襲奔京師貶復州司戶參軍按盧龍節度使前後三人皆張姓曰仲武曰允伸曰公素今乃合二名而曰仲素及詳其歷官即公素也又其逐簡會在懿宗咸通十二年距德宗時甚遠且又安取此篡奪暴戾之人而載之名宦乎今灤州乃祀之名宦祠吁皆當時修書者不學之過也

又考唐時別有一張仲素字繪之元和中為翰林學士有詩名舊唐書楊於陵傳所謂屯田員外郎張仲素白

居易燕子樓詩序所謂司勳員外郎張仲素續之

今本長慶

集誤作續之

即其人也然非盧龍節度使

張潘傳祖仲素位至中書舍人

王亘

肇慶府志宋王亘淳熙中爲博羅令築隨龍蘓村二堤

民賴其利後知南恩一統志誤作王旦今博羅名宦稱


宋丞相文正公前博羅令而不知文正未嘗爲此官

宋史

王旦傳起家以大

理評事知平江縣淳熙又孝宗年號也蓋士不讀書而

祀典之荒唐也久矣



日知錄卷二十二

欽定四庫全書

子部

日知錄卷二十三

詳校官中書臣賈鏊

員外郎臣牛稔文覆勘

覆校官中書臣田尹衡

校對官中書臣袁文邵

膳錄監生臣席大賓

欽定四庫全書

日知錄卷二十三

崑山 顧炎武 撰

姓

言姓者本於五帝見於春秋者得二十有二媯虞姓出

顓頊封于陳姒夏姓出顓頊封于杞鄆越

傳云沈姒蓀黃春秋時無

考

子殷姓出高辛封于宋

小成亦子姓

姬周姓出黃帝封于

管蔡成霍魯衛毛冊郇雍曹滕畢原鄆郇邶晉應韓凡
蔣邢茅胙祭吳虞號鄭燕魏芮彤荀賈耿滑焦楊密隨

已諸國

驪戎犬戎
皆姬姓

任宿須句顓臾風姓也自太皞秦趙

梁徐邲江黃葛麋羸姓也自少皞莒已姓薛任姓

隱十一年

疏引世本謝章薛舒呂祝

終泉畢過十國皆任姓

南燕姑姓也自黃帝

密須亦
姑姓

國語又有酉滕歲荀偃偃依

七姓其封國在周世無考

杜祁姓也自陶唐楚夔權

芊姓邾邠曹姓邶偃陽妘姓饒夷董姓也自祝融

國語
又有

彭禿斟三姓

在周世無考

齊申呂許紀州向姜姓也自炎帝

又有
姜戎 蓼

六舒舒鳩偃姓也自咎繇胡歸姓鄧曼姓羅熊姓狄隗

姓鄭瞞漆姓陰戎允姓六者不詳其所出

國語以莒為
曹姓越為芊

姓與此異

畧舉一二論之則今之孟氏季氏孫氏甯氏游氏

豐氏皆姬陳氏田氏皆媯華氏向氏樂氏魚氏皆子崔

氏馬氏皆姜屈氏昭氏景氏皆芊自戰國以下之人以

氏為姓而五帝以來之姓亡矣

或曰嬴姓出于祝融邲葛穀皆嬴姓伯益賜姓

嬴秦趙徐乃其後

凡註疏家所引姓

氏大抵出于世本今其書亡不能備考

氏族

禮記大傳正義諸侯賜卿大夫以氏若同姓公之子曰公子公子之子曰公孫公孫之子其親已遠不得上連

於公故以王父字為氏若適夫人之子則以五十字伯仲為氏若魯之仲孫季孫是也若庶子妾子則以二十

字為氏

記所云冠而字之義

則展氏臧氏是也若異姓則以父

祖官及所食之邑為氏以官為氏者則司馬司城是以邑為氏者若韓趙魏是也凡賜氏族者比為卿乃賜有大功德者生賜以族若叔孫得臣是也雖公子之身若有大功德則以公子之字賜以為族若仲遂是也其無功德死後乃賜族若無駭是也

按此論亦多不然詳見第一卷卿不書族

條

其子孫若為卿其君不賜族子孫自以王父字為族也氏族對文為別散則通也故左傳云問族於衆仲下云公命以字為展氏是也其姓與氏散亦得通故春秋有姜氏子氏姜子皆姓而云氏是也

戰國時人大抵猶稱氏族

戰國策甘茂曰昔者曾子處費費人有與曾子同名族者

而殺人不言姓而言族可見當時未嘗以氏為姓也

漢人則通謂之姓然氏族之

稱猶有存者漢書恩澤侯表褒魯節侯公子寬以魯頃公玄孫之玄孫奉周祀元始元年六月丙午封子相如

嗣更姓公孫氏

平帝紀封周公後公孫相如為褒魯侯當依表作公子寬

後更為姬

氏公子公孫氏也姬姓也此變氏稱姓之一證

水經注漢武帝元鼎四年幸雒陽巡省豫州觀於周室
邈而無祀詢問耆老乃得孽子嘉封為周子南君以奉
周祀按汲冢古文謂衛將軍文子為子南彌年其後有
子南勁紀年勁朝于魏後惠成王如衛命子南為侯秦
并六國衛最後滅疑嘉是衛後故氏子南而稱君也據
此嘉本氏子南武帝即以其氏命之為爵而漢書恩澤

侯表竟作姬嘉則沒其氏而書其姓矣與褒魯之封公孫氏更為姬氏者正同

姓氏之稱自太史公始混而為一本紀於秦始皇則曰姓趙氏於漢高祖則曰姓劉氏

氏族相傳之訛

氏族之書所指秦漢以上者大抵不可盡信唐書表李

氏則云紂之時有理徵字德靈為翼隸中吳伯

本李延壽北史

序不知三代時無此名字無此官爵也表王氏則云周

靈王太子晉以直諫廢為庶人傳記亦無此事王氏定著三房一曰琅邪二曰太原皆出靈王太子晉三曰京

兆出魏信陵君是凡王皆姬姓矣乃王莽自云舜後

漢書

元后傳莽自謂黃帝之後黃帝姓姚氏八世生虞舜舜起為汭以姁為姓至周武王封舜後姁滿于陳是為胡公十三世生完完字敬仲奔齊齊桓公以為卿姓田氏十一世田和有齊國三世稱王至王建為秦所滅項羽起封建孫安為濟北王至漢興安失國齊人謂之王家因以為氏莽敗其族尚全未必

無後裔而春秋吳有王犯晉有王良范氏之臣王生戰國齊有王斗王蠋王驩費有王順魏有王錯趙有王登

秦有王稽王齕王翦王綰王戊

過秦論有王廖未知何國人

亦未必

同出於靈王也

野客叢書曹子建作王仲宣誄曰流裔畢萬末胄稱王厥姓斯氏條分葉散世

滋芳烈揚聲秦漢呂向註秦有王翦王離漢有五侯按王繫系畢公高之後畢萬封于魏後十代文侯始列為侯至孫稱惠王因以王為氏而秦之翦離自周太子晉之後漢之五侯自齊田和之後此三派元不相干註引為一誤矣故新莽以姚矯陳田王五姓為宗室且禁元城王氏勿與四姓為婚而已自取王所之女魏東萊王基為子納太原王沈女皆不以為嫌蓋知此也庾信作宇文傑墓志亦有是誤

韓文公作王仲

舒神道碑文云王氏皆王者之後在太原者為姬姓春

秋時王子成父敗狄有功因賜氏此語卻有斟酌

竇氏古無所考類族者不得其本見左傳有后緡方娠逃出自竇之文即為之說曰帝相妃有仍氏女逃出自竇奔歸有仍生少康少康次子曰龍留居有仍遂為竇氏

唐書宰相世系表

此與王莽引易伏戎于莽升其高陵莽皇

帝名也升劉伯升也何以異哉乃韓文公作竇年墓志后緡竇逃閔腹子夏以再家竇為氏亦用此事竊意古地以竇名者甚多必是以地為氏路史曰余嘗攷之古之得姓者未有不本乎始封者也其氏於事者蓋寡矣

而姓書氏譜一每為之曲說至有棄其祖之所自出又牽異類而屬之豈不悲哉正謂若此之類也

漢時碑文所述氏族之始多不可據如魏蔣濟郊議稱曹騰碑文云曹氏族出自邾王沈魏書云其先出於黃帝當高陽世陸終之子曰安是為曹姓周武王克殷封曹俠于邾至戰國為楚所滅子孫分流或家于沛而魏武作家傳自云曹叔振鐸之後陳思王作武帝誄曰於穆武王胄稷胤周則又姬姓之後以國為氏者矣及至

景初中明帝從高堂隆議謂魏為舜後詔曰曹氏世系出自有虞氏今祀圜丘以始祖帝舜配後少帝禪晉文

亦稱我皇祖有虞氏則又不知其何所據

宋書符瑞志載博士蘇林

董巴言但云魏之氏族出自顓頊與舜同祖見於春秋世家魏志蔣濟以為舜本姓媯其苗曰田非曹之先著文以追詰隆夫以一代之君而三易其祖豈不可笑況於士

大夫乎

程氏出程伯休父太史公自序云重黎氏世序天地其在周程伯休甫其後也應劭曰封為程國伯休甫字也

其後爲司馬氏

晉書宣帝紀其先出自帝高陽之子重黎爲夏官祝融歷唐虞夏商世序其職

及周以夏官爲司馬其後程伯休甫周宣王時以世官克平徐方錫以官族因而爲氏

而左傳成

十八年晉樂書中行偃使程滑弑厲公註程滑晉大夫

襄二十三年程鄭嬖於公註鄭亦荀氏宗此則晉之程

氏乃荀氏之別不與休甫同出今既祖休甫又祖程嬰

則誤矣

路史以荀爲文王之後子華子之書亦言其族出于司馬而又曰趙則真吾姓之所宗氏也

則程又與趙同祖朱子曰子華子近世偽書今或引其說以證姓氏之所從出則誣其祖矣又按莊子及呂氏春秋子華子韓昭釐侯

時人非孔子所見之程子

沈氏宋書沈約自序昔少皞金天氏有裔子曰昧爲玄
冥師生允格臺駘臺駘能業其官宣汾洮障大澤以處
太原帝顓頊嘉之封諸汾川其後四國沈如蓐黃沈子
國今汝南平輿沈亭是也

汝南去汾
州甚遠

春秋之時列于盟

會定公四年諸侯會召陵伐楚沈子不會晉使蔡伐沈
滅之以沈子嘉歸按沈如蓐黃四國皆在汾水之上爲

晉所滅

左氏昭公元年傳曰
今晉主汾而滅之矣

黃非江人黃人之黃則沈

亦非沈子嘉之沈休文乃竝列而合之爲一誤也唐宰

相世系表曰沈氏出自姬姓周文王第十子聃叔季食

米於沈汝南平輿沈亭即其地也此爲得之

又按魯有沈猶氏家

語魯之貶羊有沈猶氏者曾子弟子沈猶行是以地爲姓漢書景帝封楚元王子歲爲沈猶侯

白氏唐白居易自序家狀曰出於楚太子建之子白公

勝楚殺白公其子奔秦代爲名將乙丙已降是也裔孫

白起有大功於秦封武安君按白乙丙見於僖之三十

三年白公之死則哀之十六年後白乙丙一百四十八

年曾謂樂天而不考古一至此哉

唐宰相世系表以西乞術白乙丙爲孟明

之子

尤誤

楊氏漢書楊

才

雄傳曰其先出自有周伯僑者以支庶

食米於晉之楊

左傳楊字父木

因氏焉楊在河汾之間周衰而

楊氏或稱侯號曰楊侯會晉六卿爭權韓魏趙興而范

中行知伯弊當是時偁楊侯楊侯逃於楚巫山因家焉

此誤以楊侯與楊食我爲一人也唐書宰相世系表曰

楊氏出自姬姓周宣王子尚父封爲楊侯又云晉之公

族食邑於羊舌

左傳正義引世族譜云羊舌其所食邑名

凡三縣一曰銅鞮

二曰楊氏三曰平陽羊舌四族叔向食采楊氏其地平
陽楊氏縣是也及晉滅羊舌氏而叔向子孫逃于華山
仙谷遂居華陰用修據此以楊陽楊羊四姓爲一尤誤
按楊城即今之洪洞縣本楊侯國左氏女叔侯所云霍
楊韓魏皆姬姓也襄二十九年而子雲反離騷亦云有周氏
之嬋媯兮或鼻祖於汾隅靈宗初謀伯僑兮流于末之
揚侯不知其字何以爲楊及其滅於晉而爲大夫羊舌
氏邑則食我始見於傳而楊朱與老子同時又非羊舌

之族也陽氏則以國爲氏以邑爲氏皆不可知

胡三省曰春秋

閔公二年齊人遷陽子孫以國爲氏

又按昭

公十二年齊高偃帥師納北燕伯于陽是邑名

晉有陽

處父乃在叔向之前而楚之陽句魯之陽虎

曾子弟子有陽膚

非一陽也宋之羊斟邾之羊羅非一羊也安得謂陽爲平陽羊爲羊古而竝附之叔向乎

段氏後漢書段熲其先出鄭共叔段古人無以祖父名爲氏者凡若此類皆不通之說按段氏當出自段干史記老子之子名宗宗魏將封于段干

唐書世系表封於段爲干木大夫膠

魏世家有段干木段干子田完世家有段干明

褚氏唐宰相世系表云出自子姓宋共公子段字子石
食采于褚其德可師號曰褚師按褚師乃官名不獨宋
有此官鄭亦有之昭公二年鄭公孫黑請以卽爲褚師
是也衛亦有褚師聲子

賀氏晉書賀循傳曰會稽山陰人也其先慶普漢世傳
禮所謂慶氏學族高祖純安帝時爲侍中避安帝父

清河

慶王諱改爲賀氏宋史賀鑄自言出王子慶忌居越之湖

澤所謂鏡湖乃慶湖也

見鐫本傳然史即疑之

按古但有以王父

字爲氏無以名爲氏者慶忌名也不得爲氏而鏡湖本

名鑑湖慶古音羗聲不相近若齊之慶氏居吳朱方見

於左傳後人以慶封有弑君之惡諱之而欲更其祖其

不及宋司馬華孫遠矣

水經注有賀臺越入吳還而成之故號曰賀臺苟欲求越國之

故何不取之於賀臺而必取

之於鏡湖又改鏡而爲慶耶

刀氏

復古編云作刀非

姓譜以爲齊大夫豎刀之後胡三省曰

豎刀安得有後漢書貨殖傳有刀間愚按古書刀與貂

通齊襄王時有貂勃

冠氏姓譜出自武王弟康叔爲周司寇後人因以氏焉
按康叔爲衛國之祖必無以王官氏其支庶之理此乃
衛之司寇左傳哀二十五年有司寇亥即冠氏之祖也
檀弓有司寇惠子

孔顏孟三氏

今之顏氏皆云兗國之裔考仲尼弟子列傳有顏幸顏
高顏祖顏之僕顏噲顏何而孔子於衛主顏雝由此六

人與讎由皆無後乎今之孔氏皆云夫子之裔春秋齊
有孔虺衛有孔達陳有孔寧鄭有孔叔孔張此四族者
皆無後乎且夫子出於宋爲子姓而鄭姬姓陳嬀姓衛
姑姓

哀十一
年孔姑

可合而爲一乎

史記貨殖傳宛孔氏之先
梁人也用鐵冶爲業春秋

魏遷孔氏南陽平準

書孔僅南陽大治

顏魯公作家廟碑云其先出於顓頊之孫祝融融孫安
爲曹姓其裔邾武公名夷甫字顏子友別封郎爲小邾
子遂以顏爲氏多仕魯爲卿大夫按左傳襄十九年齊

侯娶于魯曰顏懿姬其姪驪聲姬註曰顏驪皆姬母姓

當云則顏之爲姬姓爲魯族審矣姓譜曰顏姓本自魯母氏

邑者因其出於邾之說本自圜稱葛洪益徒見公羊於

邾有顏公之稱而不考之於左氏也莒之犁比公豈必

爲犁彌之祖乎公羊傳謂邾婁顏淫九公子於宮中因以納賊周天子誅顏而反孝公於魯非

隱公所盟之儀父不知何取於若人而以此爲祖

春秋時以孟爲字者甚多今之孟氏皆祖子輿前代亦未之有也魏書孟表濟北蛇邱人自云本屬北地號索

里諸孟

古時孟姓亦或與芒通史記秦本紀擊芒卯華陽索隱引諡周云孟卯也淮南子孟卯註引戰

國策曰

芒卯也

元史孔思晦傳五季時孔末之後方盛欲以偽

滅真害宣聖子孫幾盡至是其裔復欲冒稱宣聖後思
晦以爲不早辨則真偽久益不可明彼與我不共戴天
乃列于族與共拜殿庭可乎遂會族人斥之而重刻宗
譜于石然則今之以孔姓而濫通譜牒者可以戒矣

仲氏

漢濟陰太守孟郁修堯廟碑曰惟序仲氏祖統所出本

繼於姬周之遺苗天生仲山甫翼佐中興宣平功遂受
封于齊周道衰微失爵亡邦後嗣乖散各相土擇居帝
堯萌兆生長葬陵在於成陽聖化常存慕巍巍之盛樂
風俗之美遂安處基業屬都鄉高相里因氏仲焉以傳
於今其陰列仲氏有名者三十餘人又廷尉仲定碑畧
同漢時仲氏自謂仲山甫之後託基於帝堯之陵而今
則以爲孔子弟子子路之後援顏曾孟之例而求爲五
經博士矣然春秋之以仲氏者不一而仲山甫未嘗封

齊則漢人之祖山甫未必是而今人之祖子路亦未必非也

以國爲氏

古人之氏或以謚或以字或以官或以邑無以國爲氏者其出奔他國然後以本國爲氏敬仲奔齊而爲陳氏是也其他若鄭丹宋朝楚建邸申之類皆是也不然則亡國之遺裔也

今人姓同於國者多自云以國爲氏非也夏氏出於陳

之少西而非夏后氏之夏齊氏出於衛之齊惡而非齊國之齊左氏史記其最著明者矣

秦董父非秦國之秦
狄虎彌非狄人之狄

姓氏書

姚寬西溪叢語曰姓氏之學莫盛於元和姓纂自南北朝以官職相高沿至於唐崔盧李鄭糾紛可鄙若以聖賢所本如媯姓子姓姬姓姜姓之類各分次其所從來以及春秋所紀用世本荀況譜杜預公子譜爲法則唐虞三代列國諸侯俱可成書此似太史公欲爲而未就

者耳愚嘗欲以經傳諸書次之首列黃帝之子得姓者
十二人次則三代以上之得國受氏而後人因以爲姓
者次則戰國以下之見於傳記而今人通謂之姓者次
則三國南北朝以下之見於史者又次則代北複姓遼
金元姓之見於史者而無所考者別爲一帙

畧舉其目
曰姓本第

一封國第二氏別第三秦漢以來姓氏合并第四代

北姓第五遼金元姓第六襍改姓第七無徵第八

此

則若網之在綱有條而不紊而望族五音之紛紛者皆
無所用豈非反本類族之一大事哉

漢劉向撰世本二卷其書不傳今左傳註疏多本之然亦未必無誤

通譜

同姓通族見於史者自晉以前未有晉書石苞傳曾孫樸沒于寇石勒以與樸同姓俱出河北引樸爲宗室特加優寵位至司徒南史侯瑱傳侯景以瑱與已同姓託爲宗族待之甚厚此以殊族而附中國也晉書孫旂傳旂子弼及弟子髦輔琰四人竝有吏材稱於當世遂與

孫秀合族南史周弘正傳諂附王偉與周石珍

建康之
廨隸也

爲梁制局

監降侯景

合族舊唐書李義甫傳義甫既貴之後自言

本出趙郡始與諸李叙昭穆而無賴之徒苟合藉其權
勢拜伏爲兄叔者甚衆李輔國傳宰相李揆山東甲族
見輔國執子弟之禮謂之五父此以名門而附小人也
凡此史皆書之以志其非今人好與同姓通譜不知於
史傳居何等也

北人重同姓多通譜系南人則有比隣而各自爲族者

宋書王仲德傳北土重同姓謂之骨肉有遠來相投者
莫不竭力營贍仲德聞王愉在江南是太原人乃往依
之愉禮之甚薄魏書崔玄伯傳崔寬自隴右通欵見司
徒浩浩與相齒次厚撫之及浩誅以遠來疎族獨得不
坐遂家於武城以一子繼浩弟覽妻封氏相奉如親北
史杜銓傳初密太后杜氏父豹喪在濮陽太武欲令迎
葬於鄴謂司徒崔浩曰天下諸杜何處望高朕意欲取
杜中長老一人以爲宗正令營護凶事浩曰京兆爲美

中書博士杜銓其家今在趙郡是杜預後於今爲諸杜
最召見銓以爲宗正令與杜超子道生送豹喪葬鄴南
銓遂與超如親超謂銓曰既是宗正何緣僑居趙郡乃
延引同屬魏郡南史常鼎傳陳亡入隋時吏部尚書常
世康兄弟顯貴文帝從容謂鼎曰世康與公遠近對曰
臣宗族南徙昭穆非臣所知帝曰卿百代卿族豈忘本
也命官給酒肴遣世康請鼎還杜陵鼎乃自楚太傅孟
以下二十餘世並考論昭穆作常氏譜七卷示之歡飲

十餘日乃還

近日同姓通譜最爲濫褻其實皆植黨營私爲蠹國害民之事宜嚴爲之禁欲合宗者必上之於官使諳悉古今者爲之考定歲終以達禮部而類奏行之其不請而私通者屏之四裔然後可革其弊古之姓氏有專官掌之國語曰使名姓之後能知上下之神祇氏姓之所出者爲之宗又曰司商協名姓春官宗伯其屬有都宗人家宗人而女官亦有內宗外宗今日姓氏婚姻二事似

宜專設一官方得教民之本

氏族之亂莫甚於五代之時當日承唐餘風猶重門蔭
故史言唐梁之際仕宦遭亂奔亡而吏部銓文書不完
因緣以爲姦利至有私鬻告勅亂易昭穆而季父母舅
反拜姪甥者

豆盧革傳

冊府元龜長興初鴻臚卿柳膺將齋

卽文書兩件賣與同姓人柳居則大理寺斷罪當大辟
以遇恩赦減死奪見任官罰銅終身不齒勅曰一人告
身三代名諱傳於同姓利以私財上則欺罔人君下則

貨鬻先祖罪莫大焉自今以後如有此弊傳者受者竝
當極法今則因無蔭叙遂弛禁防五十年來通譜之俗
徧於天下自非明物察倫之主亟爲澄別則滔滔之勢
將不可反矣

唐朝已前最重譜牒如新唐書言河南劉氏本出匈奴
之後劉庫仁柳城李氏世爲契丹酋長營州王氏本高
麗之類此同姓而不同族也又如魏書高陽王雍傳言
博陵崔顯世號東崔地寒望劣此同族而不同望也故

高士廉傳言每姓第其房望雖一姓中高下懸隔

異姓稱族自漢以來未有此事杜子美寄族弟唐十八
使君詩云與君陶唐後盛族多其人聖賢冠史籍枝派
羅源津則杜與唐爲兄弟矣重送劉十弟判官詩云分
源豕鬻派別浦鴈賓秋年事推兄忝人才覺弟優則杜
與劉爲兄弟矣韓文公送何堅序亦云何與韓同姓爲
近

容齋三筆引孫緬唐韻曰韓減子孫分散
江淮間因以韓爲何字隨音變遂爲何氏

按詩揚之

水一章言戍申二章言戍甫三章言戍許孔氏曰言甫

許者以其俱爲姜姓既重章以變文因借甫許以言申其實不戍甫許也六國時秦趙同爲嬴姓史記漢書多

謂秦爲趙亦此類也

史記秦本紀太史公曰秦以其先造父封趙城爲趙氏陸賈傳秦任

刑法不變卒滅趙氏索隱曰案帝昭云秦伯翳後與趙同出蜚廉造父有功周穆王封之趙由此一姓趙氏漢書武五子傳趙氏無炊火焉帝昭曰趙秦之別氏南越傳蒼梧秦王晉灼曰秦王即趙先也趙本與秦同姓故曰秦王淮南子亦稱秦始皇爲趙政三國志陳思王上疏絕纓盜馬之臣赦楚趙以濟其難注秦穆公有赦盜馬事趙則未聞蓋以秦亦趙姓文選王融策秀才文訪游禽於絕澗作霸秦基李善註引韓非子所載趙董闕于事而云史記曰趙氏之先與秦共祖以其共祖故雖趙亦號曰秦又左思魏都賦二藏之所曾聆李善注秦

穆公趙簡子史記趙氏之先與秦同祖故曰二嬴也

崧高言生甫及申孔氏曰此

詩送申伯而及甫侯者美其上世俱出四嶽故連言之
今人之於同姓幾無不通譜何不更廣之於異姓而以
子美退之爲例也

李華淮南節度使崔公頌德碑云惟申伯翼宣王登南
邦興周室小白率諸侯征楚翟奉王職與崔公叶德同
勲皆姜姓也

開元十九年於兩京置齊太公廟建中初宰相盧杞京

兆尹盧諶以盧者齊之裔乃鳩其裔孫若崔盧丁呂之族合錢以崇飾之

元吳徵送何友道游萍鄉序云袁柳撫何二族各以儒官著而其初實一姬姓文之昭由魯之展而爲柳武之穆由晉之韓而爲何氏不同而姓同

宋邵伯溫聞見錄云司馬溫公一日過康節先生謁曰程秀才既見則溫公也問其故公笑曰司馬出程伯休父

二字姓改一字

古時以二字姓改爲一字者如馬宮本姓馬矢改爲馬
唐憲宗名純詔姓淳于者改姓于唐宰相世系表鍾離
昧二子次曰接居潁川長社爲鍾氏見之史冊不過一
二自洪武元年詔民間有色目姓一切禁止如今有呼
姓本呼延乞姓本乞伏皆明初改而并中國所自有之
複姓皆去其一字氏族之紊莫甚於此且如孫氏有二
衛之良夫楚之叔敖竝見於春秋而公孫叔孫長孫士

孫王孫之類今皆去而爲孫與二國之孫合而爲一而
其本姓遂亡公羊公沙公乘之類則去而爲公母丘母
將之類則去而爲母而其本姓遂亡司徒司空之類

唐

宗御注考經碑未有司徒巨源李邕婆羅樹碑未有司徒
玄商宋開寶商中宗廟碑翰林待詔司徒嚴書宋史
趙逢傳有禮部侍郎
集賢殿學士司徒翊則去而爲司司馬氏則去而或爲

司或爲馬而司馬之僅存於代者惟溫公之後所以然
者蓋因儒臣無學不能如魏孝文改代北之姓一一爲
之條理而聽其人之所自爲也然漢姓之改不始於是

時唐書阿史那忠以擒頡利功拜左屯衛將軍妻以宗女定襄縣主賜名爲忠單彌史氏韓文公集賢院校理石君墓誌云其先姓烏石蘭從拓跋魏氏入夏居河南遂去烏與蘭獨姓石氏劉靜修古里氏名字序云吳景初本姓古里氏以代北諸姓今各就其近似者易從中國姓故古里氏例稱吳則固已先之矣

肅宗上元二年詔氏姓與俗諦

及隱疾同聲者宜改與本族望所出

金世宗大定十

三年五月戊戌禁女直人毋得混爲漢姓得敦本之至

意

章邱志言洪武初翰林編修吳沈奉旨撰千家姓得姓

一千九百六十八而此邑如木如馮尚未之錄

廣韻馮字下註

云齊大夫名

今訪之木姓有三四百丁自云金丞相珠格高

琪之後

按珠格原文作木虎前人不知音譯故繆以為木姓之祖也

蓋二字改爲一

字者而撰姓之時尚未登於黃冊也以此知單姓之改竝在明初以後而今代山東氏族其出於金元之裔者多矣

洪武元年禁不得蒙古姓禁中國人之為蒙古姓

元時有此

俗

非禁蒙古之本姓也三年四月甲子詔曰天生斯民
族屬姓氏各有本原古之聖王尤重之所以別婚姻重
本始以厚民俗也朕起布衣定群雄爲天下主已嘗詔
告天下蒙古諸色人等皆吾赤子果有材能一體擢用
比聞入仕之後或多更姓名朕慮歲久其子孫相傳昧
其本原非先王致謹氏族之道中書省具告諭之如已
更易者聽其改正可謂正太簡要至九年三月癸未以
火你赤爲翰林蒙古編修更其姓名曰霍莊

北音讀
霍如火

益

亦倣漢武賜日磾姓金之意然漢武取義於休屠王祭
天金人亦以中國本無金姓也今中國本有霍姓而賜
之霍則與周霍叔之後無別矣況其時又多不奉旨而
自爲姓者其年閏九月丙午淮安府海州儒學正曾東
正言臣見近來蒙古色目人多改爲漢姓與土著無異
有求仕入官者有登顯要者有爲富商大賈者雖示懷
徠終慮淆混宜令復姓庶可辨識又臣前過江浦見塞
外之俘累累而有以臣所見不如早為之所至永樂元

年九月庚子上謂兵部尚書劉儁曰各衛來降人多同

名宜賜姓以別之於是兵部請如洪武中故事編置勘

合給賜姓氏

按洪武中勘合賜姓實錄不載惟十六年二月故元雲南右丞觀音保降賜姓名李

觀又宣宗實錄緯爾洪武二十一年來歸賜姓名李賢

從之三年七月賜巴圖特

穆爾名吳允誠婁圖嚕古名柴秉誠寶珠名楊效誠自

此遂以爲例而華宗賜姓與中土舊族相亂惜乎當日

之君子徒誦招攜懷遠之言而無類族辨物之道使舉

籍蕃人之來歸者賜以漢姓所無不妨如拓跋宇文之

類二字爲姓則既不混於因生賜姓胙土命氏之舊而
又使百世之下知昭代遠服四裔其得姓於朝者凡若
千族豈非曠代之盛舉哉

北方門族

杜氏通典言北齊之代瀛冀諸劉清河張宋并州王氏
濮陽侯族諸如此輩近將萬室北史薛肩傳爲河北太
守有韓馬兩姓各二千餘家今日中原北方雖號甲族
無有至千丁者戶口之寡族姓之衰與江南相去曼絕

其一登科第則爲一方之雄長而同譜之人至爲之僕役此又風俗之敝自金元以來凌夷至今非一日矣

冒姓

今人多有冒母家姓者漢書外戚恩澤侯表扶柳侯呂平以皇太后姊長姁子侯師古曰平既呂氏所生不當姓呂蓋史家唯記母族也按是時太后方封呂氏故平以姊子冒呂姓而封耳唐書天后紀聖歷二年臘月賜皇太子中宗姓武氏然則有天子而令之冒母姓者與

漢書景十三王傳趙王彭祖取江都易王寵姬王建所
姦淖姬者甚愛之生一男號淖子晉書會稽王道子傳
許榮上疏言今臺府局吏直衛武官及僕隸婢兒取母
之姓者本臧獲之徒無鄉邑品第是知冒母爲姓皆人
倫之所鄙賤然亦有帝子而稱母姓者如栗太子衛太
子史皇孫之類則以其失位而名之也

外戚傳上憐許
太子蚤失母益

霍后時

人稱之

呂平以太后姊長姁子侯此冒母姓之始

夏侯嬰傳曾
孫頗尚主主

隨外家姓號孫公主故滕公子

孫更爲孫氏此冒外祖母姓

史記灌夫傳父張孟爲

潁陰侯嬰舍人得幸因進之至二千石故蒙灌氏姓爲

灌孟大宛傳堂邑氏故夷奴甘父漢書註服虔曰堂邑

姓也漢人其奴名甘父師古曰堂邑氏之奴本夷人名

甘父下云堂邑父者蓋取主之姓以爲氏而單稱其名

曰父此冒主姓之始

新唐書元載父景昇爲曹王明妃元氏掌田租請于妃冒爲元氏

兩姓

漢書百官表建昭三年七月戊辰衛尉李延壽爲御史

大夫一姓繁

古人二名止用一字

晉侯重耳之名見於經而定四年祝佗述踐土之盟其載書止曰晉重豈古人二名可但稱其一與昭二年莒展輿出奔吳傳曰莒展之不立晉語曹僂負羈稱叔振鐸爲先君叔振亦二名而稱其一也

昭二十一年蔡侯朱出奔楚穀梁傳作蔡侯東出奔楚乃爲之說曰東者東國也

東國隱太子之子平侯廬之弟朱叔父也

何爲謂

之東也王父誘而殺焉父執而用焉奔而又奔之曰東惡之而貶之也然則以削其一名爲貶也

定六年季孫斯仲孫忌帥

師圍鄆杜氏註何

忌不言何闕文

王莽孫宗得罪自殺復其本名會宗貶厥爵改厥號是又以增其一名爲貶也

班固幽通賦發還師以成命兮重醉行而自耦潘岳西征賦重戮帶以定袞弘大順以霸世文公名止用一字本於踐土載書却非翦截古人名字之比至岳爲關中

詩云紛紜齊萬亦孔之醜馬汧督誅云齊萬哮闕震驚
台司則不通矣豈有以齊萬年爲齊萬者邪若梁王彤
爲征西大將軍而詩云桓桓梁征尤不成語

班固幽通賦巨滔天而泯夏王莽字巨君止用一巨字

王逸九思管束縛兮桎梏百貿易兮傳賣音驚遭桓繆兮

識舉才德用兮列施百里奚止用一百字此體後漢人

已開之矣

呂氏春秋干木光乎德去段字

今本呂氏卷
秩有段字

惜誓來草

順志而用國去惡字此爲翦截名字之祖

文中竝稱兩人而一氏一名尤爲變體杞殖華還二人也而淮南子稱爲殖華賈誼新書使曹勃不能制曹曹參勃周勃也史記孟子荀卿傳管嬰不及管仲嬰晏嬰也司馬遷報任安書周魏見辜周周勃魏魏其侯竇嬰也楊雄長楊賦乃命驃衛驃驃騎將軍霍去病衛大將軍衛青也杜欽傳覽宗宣之饗國常昭曰宗殷高宗也宣周宣王也徐樂傳名何必夏子俗何必成康服虔

曰夏禹也子湯也湯子姓班固幽通賦周賈盞而貢憤
周莊周賈賈誼也漢庠彰長碑云喪父事母有柴潁之
行柴高柴潁潁考叔也夏侯湛張平子碑云同賈宰貢
宰宰我貢子貢也風俗通清擬夷叔卻正釋譏徧夷叔
之高懟傅子夷叔迂武王以成名杜預遺令南觀伊雒
北望夷叔陶潛詩積善云有報夷叔在西山皆謂伯夷
叔齊漢廣漢屬國侯李翊碑夷史之高巴郡太守樊敏
碑有夷史之直皆謂伯夷史魚陶潛讀史述九章程杵

是程嬰公孫杵臼新唐書尉遲敬德傳隱巢是隱太子
巢刺王一謚一爵

古人謚止稱一字

古人謚有二字三字而後人相沿止稱一字者衛之獻

聖武公止稱武公貞惠文子止稱公叔文子晉趙獻文

子止稱文子

檀弓晉獻文子成室註謂晉君獻之廬陵胡氏曰或趙武謚獻文耳

魏惠成

王止稱惠王楚頃襄王止稱襄王秦惠文王止稱惠王

悼武王止稱武王昭襄王止稱昭王莊襄王止稱莊王

韓昭釐侯止稱昭侯宣惠王止稱宣王趙悼襄王止稱襄王漢諸葛忠武侯止稱武侯

稱人或字或爵

顏曾思孟三人皆氏而思獨字以嫌於夫子也樊鄴絳灌三人皆姓而勃獨爵以功臣周姓者多也

汾陰侯昌隆慮侯罷

魏其侯止鄴成侯絳高景侯成博陽侯聚皆周姓顏師古引楚漢春秋謂別有一人名絳灌者非

史記垓下之戰孔將軍居左費將軍居右孔將軍蓼侯孔藋也費將軍費侯陳賀也費獨以爵者以功臣陳姓

者多也

博陽侯潁曲逆侯平堂邑侯嬰陽夏侯棘蒲侯武河陽侯涓高胡侯夫乞復陽侯晉豪侯錯

猗氏侯遊龍侯署

紀信侯倉皆陳姓

子孫稱祖父字

子孫得稱祖父之字子稱父字屈原之言朕皇考曰伯

庸是也孫稱祖字子思之言仲尼祖述堯舜是也

朱子曰古

人未嘗諱字程先生云予年十四五從周茂

叔本朝先輩尚如此伊川亦嘗呼明道字

儀禮筮宅之辭曰哀子某爲其父某甫筮宅又曰哀子

某來日某卜葬其父某甫字父也虞祭之祝曰適爾皇

祖某甫卒哭之祝曰哀子某來日某濟祔爾于爾皇祖
某甫字祖也祔祭之祝曰適爾皇祖某甫以濟祔爾孫
某甫兩字之也

字爲臣子所得而稱故周公追王其祖曰王季王而兼
字

已祧不諱

冊府元龜唐憲宗元和元年禮儀使奏言謹按禮記曰
既卒哭宰夫執木鐸以命于宮曰舍故而諱新此謂已

遷之廟則不諱也今順宗神主升祔禮畢高宗中宗神主上遷請依禮不諱制可

文宗開成中刻石經凡高祖太宗及肅代德順憲穆敬

七宗諱並缺點畫高中睿玄四宗已祧則不缺文宗見

爲天子依古卒哭乃諱

鄭氏曲禮註曰生者不相辟名

故御名亦不缺

韓退之辯諱本爲二名嫌名立論而其中治天下之治

却犯正諱蓋元和之元高宗已祧故其潮州上表曰朝

廷治平日久曰政治少懈曰巍巍治功曰君臣相戒以

致至治舉張行素曰文學治行衆所推平淮西碑曰大
開明堂坐以治之韓弘神道碑銘曰無有外事朝廷之
治惟諱辯篇中似不當用

漢時祧廟之制不傳竊意亦當如此故孝惠諱盈而說
苑敬慎篇引易天道虧盈而益謙四句盈字皆作滿在
七世之內故也班固漢書律厯志盈元盈統不盈之類
一卷之中字凡四十餘見何休註公羊傳曰言孫于齊
者盈諱文已祧故也若李陵詩獨有盈觴酒與子結綢

繆枚乘柳賦盈玉縹之清酒

載古文苑

又詩盈盈一水間

載玉

臺新詠

二人皆在武昭之世而不避諱又可知其爲後人

之擬作而不出於西京矣

李陵詩不當用盈字容齋隨筆論之

後唐明宗天成四年中書門下奏少帝冊文內有基字是玄宗廟諱尋常詔勅皆不迴避少帝是繼世之孫冊文內不欲斥列聖之諱今改爲宗字

宋史紹興三十二年正月禮部太常寺言欽宗祔廟翼祖當遷以後翼祖皇帝諱依禮不諱詔恭依

謝肇淛曰宋真宗名恒而朱子於書中恒字獨不諱蓋
當寧宗之世真宗已祧

崇禎三年禮部奉旨頒行天下避太祖成祖廟諱及考

武世穆神光熹七宗廟諱正依唐人之式惟今上御名

亦須迴避蓋唐宋亦皆如此

觀漢宣帝之詔知當時已避天子之名

然止

避下一字而上一字天子與親王所同則不諱

皇太子名不諱

冊府元龜唐王紹爲兵部尚書紹名初與憲宗同憲宗

時爲廣陵王順宗即位將冊爲皇太子紹上言請改名

議者或非之曰皇太子亦人臣也

漢魏故事皇太子稱臣晉咸寧中議除此

制摯虞以爲孝經資於事父以事君義兼臣子則不嫌於稱臣詔今依舊

東宮之臣當請改

爾柰何非其屬而遽請改名豈爲以禮事上邪左司員外郎李藩曰歷代故事皆自不識大體之臣而失之因不可復正無足怪也

三國志註言魏文帝爲五官中郎將賓客如雲邴原獨不往太祖微使人問之原答曰吾聞國危不事冢宰君

老不奉世子萬歷中年往往有借國本之名而以爲題
目者得無有愧其言

唐中宗自房州還復立爲皇太子左庶子王方慶上言
太子皇儲其名尊重不敢指斥晉尚書僕射山濤啟事
稱皇太子而不言名朝官猶尚如此宮臣諱則不疑今
東宮殿及門名皆有觸犯臨事論啟迴避甚難孝敬皇
帝爲太子時改弘教門爲崇教門沛王爲皇太子改崇
賢館爲崇文館皆避名諱以遵典禮伏望依例改換制

從之史臣謂方慶欲尊太子以示中興之漸然則方慶之言蓋有爲言之也

有明之制太子親王名俱令迴避蓋失之不攷古也崇禎二年兵部主客司主事賀煥以避皇太子名改名世壽而光宗爲太子河南府及商州屬縣竝未嘗改

實錄言洪武十四年十月辛酉給事中鄭相同請依古制凡啟事皇太子惟東宮官屬稱臣朝臣則否以見尊無二上之義詔下群臣議翰林院編修吳沈言太子所

以繼聖體而承天位者也尊敬之體宜同從之歷代不稱臣之制自斯而變

親王之名尤不必諱而亦諱之正統十二年山西鄉試詩經題內維周之楨楨字犯楚昭王諱考試及同考官俱罰俸一月

二名不偏諱

二名不偏諱宋武公名司空改司空爲司城是其證也杜氏通典大唐武德九年六月太宗居春宮總萬幾下

令曰依禮二名不偏諱其官號人名及公私文籍有世及民兩字不連讀者並不須諱避唐書高宗紀貞觀二十三年七月丙午改治書侍御史爲御史中丞諸州治中爲司馬別駕爲長史治禮郎爲奉禮郎以避上名上以貞觀初不諱先帝二字有司奏曰先帝二名禮不偏諱上既單名臣子不合指斥上乃從之

通典又言太宗時二名不相連

者並不諱至玄宗始諱之然永徽初已改民部爲戶部而李世勣已去世字單稱勣矣又按隋書修於太宗時而中間多有改世爲代改民爲人者此唐人偏諱之始然亦有不盡然者經籍志四民月令作四人而齊民

要術仍民字是亦漢書註所云史駁文者也 章懷太子註後漢書亦有并其本文而改之者如胡廣傳詩美先人詢于芻蕘之類

後唐明宗名嗣源天成元年六月勅曰古者酌禮以制名懼廢於物難知而易諱貴便於時况徵彼二名抑有前例太宗文皇帝自登寶位不改舊稱時則臣有世南官有民部靡聞曲避止禁連呼朕猥以眇躬託於人上祇遵聖範非敢自尊應文書內所有二字但不連稱不得迴避若臣下之名不欲與君親同字者任自改更務

從私便庶體朕懷

嫌名

衛桓公名完楚懷王名槐古人不諱嫌名故可以爲謚
韓文公諱辯言不諱許勢秉機乃玄宗御刪定禮記月
令曰野雞入大水爲蜃曰野雞始雉則諱雉以與治同
音也李林甫序曰璿樞王衡以齊七政則諱璣德宗九
月九日賜曲江宴詩時此萬樞暇適與佳節并則諱機
以與基同音也南史劉秉不稱名而書其字曰彥節則

諱秉以與昞同音也又如武后父諱士彘而孫處約改名茂道韋仁約改名思謙睿宗諱旦而張仁亶改名仁愿玄宗諱隆基而劉知幾改名子玄箕州改名儀州

即今

遼州德宗諱适而枯州改名處州順宗諱誦而關訟律改爲關競憲宗諱純凡姓淳于者改姓于惟監察御史韋淳不改既而有詔以陸淳爲給事中改名質淳不得已改名處厚而懿宗以南詔酋龍名近玄宗諱遂不行冊禮則退之所言亦未爲定論也唐自中葉以後即士大

夫亦諱嫌名故舊史以韓愈爲李賀作諱辯爲紕繆而賈曾傳則曰拜中書舍人曾以父名忠固辭議者以爲中書是曹司名又與曾父名音同字別於禮無嫌曾乃就職懿宗紀則曰咸通二年八月中書舍人衛洙奏狀稱蒙恩除授滑州刺史官號內一字與臣家諱音同請改授閒官勅曰嫌名不諱著在禮文成命已行固難依允是又以爲不當諱也

冊府元龜咸通十二年分司侍御史李谿進狀曰臣准

西臺牒及金部稱奉六月二十七日勅內園院郝景全
事奏狀內訟字音與廟諱同奉勅罰臣一季俸者臣官
位至卑得蒙罰俸屈與不屈不合有言而事關理體若
便隱默恐負聖時願陛下寬其罪戾使得盡言臣前奏
狀稱准勅因事告事旁訟他人是咸通十一年十月十
三日勅語臣狀中具有准勅字非臣自撰辭句臣謹按
禮不諱嫌名又按職制律諸犯廟諱嫌名不坐註云謂
若禹與雨疏云謂聲同而字異註疏重複至易分曉伏

惟皇帝陛下明過帝堯孝踰大舜豈自發制勅而不避諱哉故是審量禮律以爲無妨耳即引陛下勅文而言不敢擅有移改不謂內園便有此論奏也臣非敢訴此罰俸也恐自此有援引勅格者亦須委曲迴避便成訛弊臣聞趙充國爲將不嫌伐一時事以爲漢家後法魏徵爲相不存形迹以致貞觀太平臣雖未及將相忝爲陛下持憲之臣豈可以論俸爲嫌而使國家勅命有誤也願陛下留意察納別下明勅使自後章奏一遵禮律

處分則天下幸甚勅免所罰

南唐元宗初名璟避周信祖廟諱改名景是不諱嫌名
按嫌名之有諱在漢末之聞晉羊祜爲都督荊州諸軍
事及薨荊州人爲祜諱名室戶皆以門爲稱改戶曹爲
辭曹此諱嫌名之始也

後魏地形志天水郡上邽縣犯太祖諱改爲上封魏太
祖名珪

宋代制於嫌名字皆避之禮部韻畧凡與廟諱音同之

字皆不收太祖諱匡循十陽部去王切一十三字二十

一震部羊晉切一十一字皆不收它皆倣此朱子周易

本義姤卦下以故爲姤作故爲遇避高宗嫌名也

宋板書貞

字完字多是缺筆貞音同禎仁宗諱完音同桓欽宗

諱 豈

諱 雖錄以貞女樹爲正女木樹音同曙英宗諱

不聞顏氏家訓所云呂尚之兒如不爲上趙壹之子倘

不作一便是下筆即妨是書皆觸者乎

金章宗泰和元年七月己巳初

禁廟諱同音字

蓋亦倣宋制也

明代不諱嫌名如建文年號是也

以諱改年號

唐中宗諱顯玄宗諱隆基唐人凡追稱高宗顯慶年號
多云明慶永隆年號多云永崇趙元昊以父名德明改
宋明道年號爲顯道而范文正公與元昊書亦改後唐
明宗爲顯宗

杜氏通典釋法明遊天竺記明下有國
諱改焉四字當是小註今本連作大文

前代諱

孟蜀所刻石經於唐高祖太宗諱皆缺書石晉相里金
神道碑民珉二字皆缺末筆南漢劉巖尊其父謙爲代

祖聖武皇帝猶以代字易世至宋益遠矣而乾德三年
卜諱伏羲女媧廟碑民珉二字咸平六年孫冲序絳守
居園池記碑民珉二字皆缺末筆其於舊君之禮何其
厚與予至西安見宋咸平二年夢英自書篆書目錄偏
旁字源序立于文宣王廟者稱長安爲故都而唐
字跳行蓋嘆昔人之厚其
時唐之亡已九十二年矣

楊阜魏明帝時人也其疏引書協和萬國猶避漢高祖
諱帝昭吳後主時人也其解國語凡莊字皆作嚴猶避
漢明帝諱唐長孫無忌等撰隋書易忠節傳以誠節稱

符堅爲符永固亦避隋文帝及其考諱

後漢應劭作風俗通有諱舊君

之自古相傳忠厚之道如此今人不知之矣

元移刺廸爲常州路總管刻其所點四書章句或問集

註其凡例曰凡序註或問中題頭及空處並存其舊以

見當時忠上之意

如宋德隆盛之類

近歲新刊大學衍義亦然

時天厯元年也資治通鑑周太祖世宗紀太祖皇帝皆

題頭至今仍之孟子見梁襄王章末註蘇氏曰予觀孟

子以來自漢高祖及光武及唐太宗及我太祖皇帝能

一天下者四君太祖上空一字永樂中修大全於其空處添一宋字後人之見與前人相去豈不遠哉

名父名君名祖

金縢周公之祝辭曰惟爾元孫某左傳荀偃濟河而禱

稱曾臣彪名君也

淮南子曰祝則名君

左傳楚子圍宋申犀見王

稱無畏知瑩對楚王稱外臣首鄢陵之戰欒鍼曰書退

名父也華耦來盟稱君之先臣督欒盈辭于周行人曰

陪臣書曰其子鷹名祖若父也

弟子名師

論語長沮曰夫執輿者爲誰子路曰爲孔丘孟子樂正子入見曰君奚爲不見孟軻也是弟子而名師也

同輩稱名

古人生不諱名同輩皆面呼其名書周公若曰君奭禮記曾子問篇老聃曰丘檀弓篇曾子曰商論語微生畝謂孔子曰丘是也

以字爲諱

古人敬其名則無有不稱字者顏氏家訓曰古者名以正體字以表德名終則諱之字乃可以爲孫氏孔子弟

子記事者皆稱仲尼

子貢曰仲尼日月也

魏鶴山

呂

云儀禮子孫於祖禰皆稱字

后微時嘗字高祖爲季漢袁種字其叔父益曰繇王丹與侯霸子語字霸爲君房江南至今不諱字也河北士人全不辨之故有諱其名而并諱其字者三國志司馬朗傳年九歲人有道其父字者朗曰慢人親者不敬其親者也客謝之常林傳年七歲有父黨造門問林伯先

在否林不答客曰何不拜林曰雖當下拜臨子字父何
拜之有晉書儒林劉兆傳嘗有人著犢騎驢至兆門外
曰吾欲見劉延世兆儒德道素青州無稱其字者門人
大怒兆曰聽前舊唐書韓愈傳拜中書舍人有不悅愈
者言愈前左降爲江陵掾曹荆南節度使裴均館之頗
厚近者均子鶚還省父愈爲序餞鶚仍呼其字此論喧
於朝列坐是改太子右庶子至於山陽公載記言馬超
降蜀常呼先主字關羽怒請殺之此則面呼人主之字又

不可以常儕論矣

自稱字

漢書註張晏曰匡衡少時字鼎世所傳衡與貢禹書上言衡敬報下言匡鼎白南史陶弘景自號華陽隱居人間書札即以隱居代名此自稱字之始也

東觀餘論言古人或有自稱字者王右軍敬謝帖云王逸少白廬山遠公集盧循與遠書云范陽盧子先叩首柳少師與弟帖云誠懸呈今按唐權德輿答楊湖南書

稱載之再拜柳冕答鄭衢州書稱敬叔頓首白居易與
元九書稱樂天再拜宋陳搏謁高公詩稱道門弟子圖
南上

唐張謂長沙風土碑銘有唐八葉元聖六載正言待理
湘東張洸濟瀆廟祭器幣物銘濯纓不才謬領茲邑元
稹作白氏長慶集序自書曰微之序乃是作文自稱其
字

自稱其字不始於漢人家父吉甫寺人孟子之詩已先

之矣

人主呼人臣字

漢高帝曰運籌策帷帳之中決勝千里之外吾不如子

房

張良字

景帝曰天下方有急王孫

竇嬰字

寧可以讓邪皆

人主呼人臣字也

晉以下人主於其臣多不呼名南史梁蔡樽爲吏部尚書侍中武帝嘗設大臣筵樽在坐帝頻呼姓名樽竟不答食筵如故帝覺其負氣乃改喚蔡尚書樽始放筋執

笏曰爾帝曰卿向何聾今何聰對曰臣預爲右戚且職

在納言陛下不應以名垂與帝有慙色

文選范雲表稱乃祖玄平李善

註引晉中興書范汪字玄平魏書江式表稱臣亡祖文威式祖強字文威

又南朝人如王敬

弘王仲德王景文謝景仁北朝人如蕭世怡李元操之

輩名犯帝諱即以字行不復更名

宋褚叔茂張叔茂名與太和諱同以字行

通鑑大同二年時人多以字行舊史皆因之周帝叔裕字孝寬以字行魏書多稱揚遵彦

魏王

昕對汝南王悅自稱元景北齊祖珽對長廣王湛自稱

孝徵隋崔頤答豫章王啟自稱祖濬王貞答齊王暕啟

自稱孝逸而唐太宗時如封倫房喬高儉尉遲恭顏籙竝以字爲名蓋因天子常稱臣下之字故爾其時堂陛之間未甚濶絕君臣而有朋友之義後世所不能及矣因話錄文宗對翰林諸學士因論前代文章裴舍人素數道陳拾遺名柳舍人璟目之裴不覺上顧柳曰他字伯玉亦應呼陳伯玉

兩名

禮記正義公羊說春秋譏二名謂二字作名若魏曼多

也

公羊傳春秋以仲孫何忌爲仲孫忌
魏曼多爲魏多皆謂譏二名而去之

左氏說二名者

楚公子棄疾弑其君即位之後改名爲居是爲二名許
慎謹案云文武賢臣有散宜生蘇忿生則公羊之說非

也

白虎通古人之名或兼或單春秋譏
二名乃謂其無常者也是用左氏說

今按古人兩名

見於經傳者不止楚平王如晉文侯名仇而書云父義
和楚靈王名圍而春秋書弑其君虔于乾谿趙簡子名
鞅而鐵之戰自稱志父南宮敬叔名說一名縉字容又
字栝蜚廉石棺銘自稱處父屈原名平其作離騷也名

正則字靈均賈誼傳梁王勝註李竒曰文三王傳言揖此言勝爲有兩名

假名甲乙

史記萬石君傳長子建次子甲次子乙次子慶甲乙非名也失其名而假以名之也韓安國傳蒙獄吏田甲張湯傳湯之客曰甲漢書高五王傳齊宦者徐甲嚴助傳閩越王弟甲疑亦同此

孟嘗君傳田甲劫
潘王當是其名

任安傳某子

甲何爲不來乎三國志註許攸呼魏太祖小字曰某甲

卿不得我不得冀州也左傳文十四年齊公子元不順

懿公之爲政也終不曰公曰夫已氏註猶言某甲

文選
爲齊

明帝議宣城郡公表謹附某官某甲奉

表以聞宣德皇后令今遣某位某甲等

漢書魏相傳中謁者趙堯舉春李舜舉夏兒湯舉秋貢
禹舉冬不應一時四人同以堯舜禹湯爲名若有意撰
而名之者及讀急就章有云祖堯舜樂禹湯乃悟若此
類皆古人所假以名之也或曰高帝時實有趙堯然非
謁者

蜀漢費禕作甲乙論設爲二人之辭

世說云黃初中有甲乙疑論

晉

人文字每多祖此虛設甲乙中書令張華造甲乙之問
云甲娶乙爲妻後人娶丙博士弟子徐叔中服議以母
爲甲先夫爲乙後夫爲丙先子爲丁繼子爲戊梁范縝
神滅論有張甲王乙李丙趙丁而關尹子云甲言利乙
言害丙言或利或害丁言俱利俱害關尹子亦魏晉間
人所造之書也先秦以上即有以甲乙爲彼此之辭者
韓非子罪生甲禍歸乙伏怨乃結

以姓取名

古人取名連姓爲義者絕少近代人命名如陳王道張四維呂調陽馬負圖之類榜目一出則此等姓名幾居其半不知始自何年嘗讀通鑑至五代後漢有號州伶人靖邊庭胡身之註曰靖姓也優伶之名與姓通取一義所以爲謔也

靖邊庭亦見宋史田欽祚傳

考之自唐以來如黃繡

綽雲朝霞

唐書魏暮傳

鏡新磨

五代史伶官傳

羅衣輕

遼史伶官傳

之輩

皆載之史書益信其言之有據也嗟乎以士大夫而效

伶人之命名則自嘉靖以來然矣

以父名子

左傳成十六年潘尫之黨潘尫之子名黨也襄二十三年申鮮虞之傳摯申鮮虞之子名傅摯也按儀禮特牲饋食禮筮某之某爲尸註曰某之某者字尸父而名尸

也

少牢饋食禮同

亦此類也

史記太史公自序維仲之省厥渚王吳渚乃劉仲之子稱爲厥渚

以夫名妻

左傳昭元年當武王邑姜方震大叔漢書杜欽傳皇太

后女弟司馬君力

蘇林曰字君力
爲司馬氏婦

南齊書周盤龍愛妾

杜氏上送金釵鑷二十枚手勅曰餉周公阿杜孔叢子
衛將軍文子之內子死復者曰皋媚女復子思聞之曰
此女氏之字非夫氏之字也婦人於夫氏以姓氏稱禮
也

兼舉名字

史文有一人而兼舉名字如子玉得臣百里孟明視之
類已於左傳見之

皋陶庭堅亦
一人兩稱

若駢儷之文必無重出

而亦有一二偶見者焦氏易林申公顛倒巫臣亂國劉琨答盧諶詩宣尼悲獲麟西狩涕孔丘謝惠連秋懷詩雖好相如達不同長卿慢沈約宋書恩倖傳論胡廣累世農夫伯始致位公相黃憲牛醫之子叔度名動京師皆一人而兼舉其名字也古詩誰能刻鏤此公輸與魯班下一與字竟以公輸魯班爲二人則不通矣

排行

兄弟二名而用其一字者世謂之排行如德宗德文義

符義真之類起自晉末漢人所未有也水經注昔北平侯王譚不同王莽之政子興生五子竝避亂隱居光武即帝位封爲五侯元才北平侯益才安喜侯顯才蒲陰侯仲才新市侯季才唐侯是後人追撰妄說東漢人二名者亦少

單名以偏旁爲排行始見於劉琦劉琮此後應璩應瑒

衛瓘衛玠之流踵之而出矣

陳球傳二子瑒瑒弟子珪若取偏旁又不當與父同

也

今人兄弟行次稱一爲大不知始自何時漢淮南厲王常謂上大兄孝文帝行非第一也

二人同名

有以二人同名而合稱之者左傳莊二十八年晉獻公外嬖梁五與東關嬖五晉人謂之二五耦戰國策杜赫謂楚王曰此用二忌之道也以齊田忌鄒忌爲二忌唐高宗顯慶二年詔曰蹤二起於吳白蓋倣此稱

字同其名

名字相同起於晉宋之間史之所載晉安帝諱德宗字德宗恭帝諱德文字德文會稽王道子字道子殷仲文字仲文宋蔡興宗字興宗齊顏見遠字見遠梁王僧孺字僧孺劉孝綽字孝綽庾仲容字仲容江德藻字德藻任孝恭字孝恭師覺授字覺授北齊慕容紹宗字紹宗魏蘭根字蘭根後周王思政字思政辛慶之字慶之崔彥穆字彥穆之類至唐時尤多

藩鎮傳田緒字緒劉濟字濟此起家軍伍未曾立字如

李載義辭未有字之比爾史家例以爲字非也且其文不可省乎

變姓名

古人變姓名多是避仇然亦有無所爲而變者范蠡適齊爲鴟夷子皮之陶爲朱公第五倫客河東自稱王伯齊梁鴻適齊姓運期名耀

生而曰諱

生曰名死曰諱今人多生而稱人之名曰諱金石錄云

生而稱諱見於石刻者甚衆因引孝宣元康二年詔曰
其更諱詢以爲西漢已如此蜀志劉豹等上言聖諱豫
覩許靖等上言名諱昭著晉書高頴言范伯孫恂恂率
道名諱未嘗經於官曹束皙勸農賦場功畢租輸至錄
社長召閭師條牒所領注列名諱王褒洞簫賦幸得諡
爲洞簫兮李善註諡
者號也號而曰諡猶
之名而曰諱者矣

生稱諡

漢書張敖傳呂后數言張王以魯元故不宜有此劉攽

曰史家記事或有如此追言諡者史記貫高與張敖言
謂帝爲高祖公羊傳公子翬與桓公言吾爲子口隱矣
皆此類

公羊傳註諡者傳家所加

今按傳記中此例尚多如左氏傳

石碯曰陳桓公方有寵於王國語鮑國謂子叔聲伯曰
子何辭苦成叔之邑戰國策智過曰魏桓子之謀臣曰
趙葭韓康子之謀臣曰段規史記秦本紀晉文公夫人
請曰繆公怨此三人入於骨髓魯世家周公戒伯禽曰
我文王之子武王之弟成王之叔父宋世家華督使人

宣言國中曰殤公即位十年耳而十一戰楚世家國人
每夜驚曰靈王入矣隨人謝吳王曰昭王亡不在隨齊
湣王遺楚王書曰今秦惠王死武王立鄭世家莊公曰
武姜欲之楚共王曰鄭成公孤有德焉趙世家吳延陵
季子使於晉曰晉國之政卒歸於趙武子趙文子
名武韓宣
子魏獻子之後矣韓世家屈宜臼曰昭侯不出此門吳
起傳公叔之僕曰君因先與武侯言仲尼弟子傳子羔
曰出公去矣而門已閉魯仲連傳新垣衍謂趙王曰趙

誠發使尊秦昭王爲帝褚先生補梁孝王世家竇太后
謂景帝曰安車大駕用梁孝王爲寄三王世家公戶滿
意謂燕王曰今昭帝始立荀子周公謂伯禽之傅曰成
王之爲叔父呂氏春秋豫讓欲殺趙襄子其友謂之曰
以子之才而索事襄子淮南子先軫曰昔吾先君與繆
公交諸御鞅復於簡公曰陳成常宰予二子者甚相憎
也吳越春秋子胥曰報汝平王說苑景公曰善爲我浮
桓子也衛叔文子曰今我未以往而簡子先以來竝是

生時不合稱謚又如禮記曾子問孔子曰季桓子之喪衛君請弔哀公辭不得命公爲主客入弔康子立於門右孔子沒時哀公康子俱存此皆後人追爲之辭也自東京以下即無此語文益謹而格卑矣

史記田敬仲世家齊人歌之曰姬乎采芑歸乎田成子史通曰田常見存而遽呼以謚蘇氏曰田常之時安知其爲成子而稱之

稱王公爲君

稱周文王爲文君焦氏易林文君燎獵呂尚獲福號稱
太師封建齊國漢張衡思立賦文君爲我端著兮利飛
遁以保名稱晉文公爲文君楚辭惜往日介子忠而立
枯兮文君寤而追求淮南子晉文君大布之衣牂羊之
裘又云介子歌龍蛇而文君垂泣稱宋文公爲文君墨
子昔者宋文君鮑之時稱楚莊王爲莊君荀子莊君之
胥稱齊莊公爲莊君墨子昔者齊莊君之時稱魯昭公
爲昭君焦氏易林乾侯野井昭君喪居稱齊景公爲景

君宋何承天上陵篇指營邱感牛山爽鳩既沒景君歎
稱宋襄公爲襄君周庾信入彭城館詩襄君初建國稱
宋元公爲元君莊子宋元君夜半而夢



日知錄卷二十三